

EL SANTO EVANGELIO SEGUN SAN MARCOS

Juan upurumbibautiza vae umimbeu Tumpa iñee
(Mt 3.1-12; Lc 3.1-20; Jn 1.19-28)

1 ¹Añave aicuatía aĩ ñee icavi vae Jesucristo regua. Jesucristo co jae Tumpa Tai.
²Isaías co jae penti Tumpa iñee aracae umimbeu vae. Jae uicuatía cuarai: “Mase” —jei Tumpa—, “che amondota chiñee güíraa vae nderenonde, uyapicatu vaerã nderaperã.
³ Jae iñeeäta reve jeita ñana pe:
‘Piyapicatu yandeYa japerã.
Pemisimi tape” —jeita, jei Tumpa.
Jucuarai uicuatía Isaías. ⁴Jáeramo Juan ou upurumbibautiza ñana pe, jare umimbeu yati ñugüinoi vae reta pe:
—Peeya piyeminguela icavi mbae vae pepia pe oĩ vae, jare che pumbibautizada, Tumpa umbiasa vaerã peve pumbaeyoa reta —jei chupe reta. ⁵Jare jeta ivi Judea pegua reta jare tenta guasu Jerusalén pegua reta yugüiraa Juan oĩ vae pe. Jare Juan umbibautiza reta iäca Jordán jee vae pe, imbaeyoa reta opa umimbeu yave. ⁶Jare Juan jemimonde maemimba camello jee vae jaagüe pegua co, jare jumbicuaa guacapi pegua co. Jare jembíu co jae tucu jare ei ñana rupigua. ⁷Jae umimbeu yati vae reta pe:
—Cheraicue rupi outa ipuere ete chegüi vae. Jupi'ã co che chepe ayora vaerã ipipasa ichã. ⁸Che pumbibautiza i pe, ërei jae pembibautizada Espíritu Santo pe —jei chupe reta.

Juan umbibautiza Jesús
(Mt 3.13-17; Lc 3.21-22)

⁹Jare mbovi ara rupi ou Jesús tenta guasu Nazaret ivi Galilea pegua güi. Jare Juan umbibautiza Jesús iäca Jordán pe. ¹⁰Jare Jesús oẽ ye i güi

yave, uecha ara uyepea oĩ, jare uecha vi Espíritu Santo ugüeyí jese picasu rami. ¹¹Jayave uyendu ñee ara güi jei:

—Nde co jae cheRaĩ nduaau ete vae. Chembiyerovia ete —jei.

Satanás umingueta Jesús uyavica vaerã tẽi chupe

(Mt 4.11-12; Lc 4.11-12)

¹²Jayave Espíritu Santo omondo Jesús ñana pe. ¹³Jare upita ñana pe cuarenta ara, jare Satanás umingueta uyavica vaerã tẽi chupe. Jare ico Jesús maemimba ñana rupigua reta ñugüinói vae pe. Jare yugüieru ángel reta ombori vaerã.

Jesús umbipi iparavíqui

(Mt 4.12-17; Lc 4.14-15)

¹⁴Juan uyemiingueca ma peresoriru pe yave, oo Jesús Galilea pe, jare umimbeu ñee icavi vae Tumpa iporoyocuia regua. ¹⁵Jesús jei:

—Ara uvãe ma. Outa uvãe Tumpa iporoyocuia. Peeya piyemingueta icavi mbae vae pepia pe oĩ vae, jare perovia Tumpa iñee icavi vae —jei.

Jesús ueni irundi cuimbae pira uipisi vae reta

(Mt 4.18-22; Lc 5.1-11)

¹⁶Jare uguata rambueve i guasu Galilea jembei rupi, Jesús uecha Simón jare Simón tiví Andrés jee vae. Jae reta omombo ñugüinói pisa i guasu pe, pira uipisi vaerã. Echalá jae reta pira uipisi vae reta co. ¹⁷Jayave Jesús jei chupe reta:

—Peyu cherupié, jare che chembapuere pe pemboeta íru vae reta güirovia vaerã cheré —jei.

¹⁸Jayave ueya reta ipisa, jare yugüiraa jae jupié. ¹⁹Ndei mbiri oo mbove, Jesús uecha Zebedeo tai reta. Penti jee Jacobo, jare tiví jee Juan. Uyapicatu ñugüinói pisa reta chalana pe. ²⁰Jare Jesús ueni voi. Jayave jae reta ueya tu chalana pe uparavíqui chupe vae reta ndive, jare yugüiraa Jesús jupié.

Cuimbae aña oya jese vae

(Lc 4.31-37)

²¹Jare yugüiraa uvãe tenta guasu Capernaum pe. Jare mbutuu ara pe Jesús uiqie judío reta itupao pe, jare joco pe oporomboe. ²²Jare uyapisaca jese vae reta ipiacañi iporomboe re. Echalá omboe reta mbaepuere güinói vae rami. Jucuaráilá oporomboe mboroyocui re oporomboe vae reta.

²³Jare uiqie oo tupao pe cuimbae aña oya jese vae. Jae iñeeäta reve jei:

²⁴—¿Maera pa ndeyu oremambecho, Jesús Nazaret pegua? ¿Ndeyu pa oremicañitei vaerã? Che nducuaa. Nde co jae Tumpa Tai —jei.

²⁵Jayave Jesús uñeengata aña pe.

—¡Nequii! Esiri chugüi —jei.

²⁶Jayave aña umbiriri ete jocua cuimbae, jare tanta jāse reve usiri chugüi. ²⁷Jare opaete uecha vae reta ipiacañi, jare upírandu uyupe:

—¿Mbae pa co cua uyapo vae? ¡Moromboe ipiau vae ndipo! Mbaepuere pe oyocui aña reta usirí vaerā oya jese vae reta güi, jare jae reta uyapo oyocui vae —jei reta.

²⁸Jayave imambaeño jerācua jesegua opaete Galilea rupi.

Jesús umbigüera Pedro jaicho

(Mt 8.14-15; Lc 4.38-39)

²⁹Jare Jesús judío reta itupao güi oẽ ye yave, oo Simón jare Andrés jenta pe Jacobo jare Juan ndive. ³⁰Simón jaicho jacu oĩ jupa pe. Jare ūru reta umimbeu Jesús pe jesegua. ³¹Jayave Jesús oo uipisi ipo pe, jare umupūa. Jare jacu upita voi chugüi. Jayave jocua cuña umee mbae jou reta vaerā.

Jesús umbigüera jeta imbaerasi vae reta

(Mt 8.16-17; Lc 4.40-41)

³²Jare guarasi uique ma yave, tenta guasu pegua reta güeru Jesús pe imbaerasi vae reta jare aña oya jese vae reta. ³³Jare jeta joco pegua reta uyembati jocua tenta jonque pe. ³⁴Jayave Jesús umbigüera jeta imbaerasi vae reta ipotave mbaerasi güi, jare umbisirí jeta aña reta oya jese vae reta güi. Jare umaeño'ã aña reta re uyemingueta vaerā. Echa'ã jae reta uicuua quía co jae.

Jesús oo ivi Galilea rupi umimbeu Tumpa iñee

(Lc 4.42-44)

³⁵Piareve pe Jesús upúa ndei cõe mbove, jare oẽ oo quïi ngatu vae pe. Joco pe uyerure oĩ Tumpa pe. ³⁶Jayave Simón jare jae ndive ñugüïnoi vae reta yugüiraa ueca. ³⁷Jare uväe chupe yave, jei reta Jesús pe:

—Ndereca ñugüïnoi reta —jei reta.

³⁸Jayave Jesús jei chupe reta:

—Yaa ūru tenta guasu-rai reta coiño ñugüïnoi vae pe, joco pe vi amimbeu vaerā Tumpa iñee. Echa'ã ayu cua ayapo vaerā —jei.

³⁹Jare oo opaete ivi Galilea rupi, jare umimbeu Tumpa iñee judío reta itupaopao rupi, jare umbisirí aña reta oya jese vae reta güi.

Jesús umbigüera cuimbae ipire ocui vae

(Mt 8.1-4; Lc 5.12-16)

⁴⁰Jayave ou Jesús oĩ vae pe penti cuimbae ipire ocui vae. Uyeatica Jesús jovai jare uyerure chupe:

—Ndipota yave, ndepuere chembigüera —jei chupe.

⁴¹Jesús uiparareco umae jese, jare oñono ipo jese.

—Aipota. Ecuera —jei chupe.

⁴²Jare jupivoiño cuimbae ucuera imbaerasi güi. Ocui'ã ma ipire. ⁴³Jare jupivoiño Jesús oyocui ete, ndei omondo mbove:

44—Agüiye emimbeu quía pe. Ecua iyeechaca sacerdote pe, jare emee ofrenda Moisés peocui rami, tenta guasu pegua reta uicuña vaerā ndecuera ma co —jei.

45—Erei cuimbae oo, jare umbipi umimbeu ūru vae reta pe. Jecuae umimbeu jeta vae pe. Jáeramo Jesús ipuere'ā ma oo tenta guasu reta pe joco pegua reta jovaque. Upita ñana rupi, jare yugüeru jae oī vae pe opaete que rupi rupi güi.

Jesús umbigüera cuimbae ipuere mbae omi vae
(Mt 9.1-8; Lc 5.17-26)

2 ¹Mbovi ara rupi Jesús oo ye Capernaum pe, jare jerácujae ime oī jenta pe. ²Jayave jeta vae uyembati joco pe, jare tñee ñugüinói o pe jare onque rupi. Jare Jesús umimbeu Tumpa iñee chupe reta. ³Jayave amocue yugüeru vae reta güeru penti cuimbae imbaerasí vae. Cua cuimbae ipuere mbae omi vae. Uyerevoica ou irundi cuimbae reta pe. ⁴—Erei güeru vae reta ipuere'ā uruique jocua cuimbae Jesús oī vae pe, uyembiapé'ā ye ñugüinói reta ramo. Jáeramo uruyupi o iárambo jare uipecia chupe Jesús jese catu. Joco pe umbigüeyi jocua cuimbae ipuere mbae omi vae jupa reve. ⁵Jesús cua uecha yave, uicuña jae reta güirovia co jese, jare jei cuimbae ipuere mbae omi vae pe:

—Nembayoia reta uyembai ma, cherivi.

⁶Amocue mboroyocui re oporomboe vae reta uguapi ñugüinói joco pe, jare ipia pe uyemingueta reta: ⁷“¿Maera pa jei cuarái cua cuimbae? Jei icavi mbae vae Tumpa coti. Tumpaño co ipuere umbiasa quía pe imbaeyoa reta.” Jucuarái ipia pe uyemingueta reta. ⁸Jare Jesús uicuña voi jae reta ipiayeminguela, jare jei chupe reta:

—¿Maera pa pepia pe piyemingueta jucuarái? ⁹Chepuere jae cua cuimbae ipuere mbae omi vae pe: ‘Nembayoia reta uyembai ma.’ Jae ramíño vi chepuere jae chupe: ‘Epúa evoi nderupa, jare eguata.’ ¿Mbae nunga pa yavai jae vaerā? —jei Jesús chupe reta—. ¹⁰—Erei aipota picuña vaerā cua: Che cuimbaerā ayeyapo vae chepuere ambiasa quía pe imbaeyoa reta cua ívi pe aí rambueve —jei.

Jayave jei cuimbae ipuere mbae omi vae pe:

¹¹—Che jae ndeve: Epúa evoi nderupa, jare ecua nerenta pe.

¹²Jayave cuimbae upú, jare ovoi jupa, jare oē voi oo opaete joco pe ñugüinói vae reta jovaque. Opareve ipiacaní, jare umbiadora reta Tumpa.

—Yaecha'ái cua nunga —jei reta.

Jesús ueni Leví
(Mt 9.9-13; Lc 5.27-32)

¹³Jayave Jesús oo ye i guasu jembei pe. Jare jeta vae reta uyembati jae oī vae pe, jare jae omboe reta. ¹⁴Jare joco güi oo yave, uecha Alfeo tai Leví jee vae uguapi oī mburuvicha peguará ocovara ñugüinói vae pe, jare jei chupe:

—Eyu cherupié.

Jayave Leví upú, jare oo jae jupié.

¹⁵Jare Jesús ucaru oī rambueve Leví jenta pe, jeta mburuvicha peguarā ocovara vae reta jare teco icavi mbae vae uyapo vae reta ucaru vi ñugüinói Jesús jare jemimboe reta ndive. Echa'ã jecuaeño jeta jae reta yugüiraa Jesús ndive. ¹⁶Jayave mboroyocui re oporomboe vae reta jare fariseo reta uecha yave Jesús ucaru oī ocovara vae reta jare teco icavi mbae vae uyapo vae reta ndive, jei jemimboe reta pe:

—¿Maera pa ucaru pemboe vae ocovara vae reta jare teco icavi mbae vae uyapo vae reta ndive?

¹⁷Jesús cua uyandu yave, jei chupe reta:

—Icove catu vae reta ueca'ã upurupiáno vae. Imbaerasí vae retaño ueca. Che ayu aeca vaerā iyoa vae reta. Ayu'ã aeca vaerā jupi vae reta —jei.

Maera Jesús jemimboe reta uyecuacu'ã tembíu güi
(Mt 9.14-17; Lc 5.33-39)

¹⁸Jare Juan jemimboe reta jare fariseo jemimboe reta uyecuacu ñugüinói tembíu güi. Jayave amocue vae yugüeru, jare upirandu Jesús pe:

—¿Maera pa Juan jemimboe reta jare fariseo jemimboe reta uyecuacu tembíu güi, ērei nderemimboe reta uyecuacu'ã chugüi?

¹⁹Jayave Jesús jei chupe reta:

—Umendata vae pe ñugüinói vae reta ndarau etei uyecuacu tembíu güi, umendata vae jae reta ndive oī rambueve. Echa'ã umendata vae jae reta ndive oī rambueve, uyecuacu'ã tembíu güi. ²⁰Ērei outa uvāe ara umendata vae uyereraaca vaerā chugüi reta. Jayave ramo uyecuacuta tembíu güi —jei—. ²¹Icaví'ã yamboa vaerā temimonde indechi vae maembaya ipiau vae pe. Echa'ã jucuarāi yayapo yave, maembaya ipiau vae umiāta temimonde indechi vae, jare temimonde jeiete osoro —jei—. ²²Jae ramiño vi icaví'ã yambiru vaerā vino ipiau vae vino jiru guacapi indechi vae pe. Echa'ã jucuarāi yayapo yave, vino omondoro jiru, jare vino uyepiyere, jare jiru icaví'ã ma. Jáeramo yambiru vino ipiau vae jiru ipiau vae pe —jei chupe reta.

Jesús jemimboe reta uipoo trigo mbutuu ara pe
(Mt 12.1-8; Lc 6.1-5)

²³Mbutuu ara pe Jesús oo co rupi jemimboe reta ndive. Uasa rambueve, jemimboe reta uipoo trigo. ²⁴Jayave fariseo reta jei Jesús pe:

—Mase, ¿maera pa uyapo reta agüiyeta tēi uyapo mbutuu ara pe vae?

²⁵Jesús jei chupe reta:

—¿Peminguela'ã pa David uyapocue vae regua, jae jare jae ndive ñugüinói vae reta mbaeti ma mbae güinói yave jare iyembaí reta? —jei—.

²⁶David uique Tumpa jo pe, sacerdote tenondegua Abiatar jee vae ico yave, jare jou mbiyape Tumpa jo pe uñeñono tee vae reta. Agüiyeta tēi co quía jou jocua mbiyape, jaeño sacerdote reta. Jare David umee vi jae ndive ñugüinói vae reta pe —jei chupe reta.

²⁷Jayave Jesús jei chupe reta:

—Mbutuu ara uyeyapo yanembori vaerā. Yande yayeyapo'ā mbutuu ara peguarā. ²⁸Jáeramo che cuimbaerā ayeyapo vae chepuere jae mbae icavi uyeyapo vaerā mbutuu ara pe —jei.

Cuimbae ipo jovalcho tipa vae
(Mt 12.9-14; Lc 6.6-11)

3 ¹Jesús uique ye judío reta itupao pe, jare joco pe oī penti cuimbae ipo jovalcho tipa vae. ²Jare joco pe ñugüinoi vae reta umae ngatu Jesús re, uecha vaerā umbigüerata ra quía mbutuu ara pe. Echa'ā jae reta uipota tēi umbijeco Jesús. ³Jayave Jesús jei cuimbae ipo jovalcho tipa vae pe:

—Epúa eyu iyemboi cua reta jovai.

4Jare Jesús upirandu joco pe ñugüinoi vae reta pe:

—¿Yayapota pa icavi vae ani icavi mbae vae mbutuu ara pe? ¿Icavi pa yapuruepi ani yapuruyuca vaerā mbutuu ara pe? ¿Mbae pa jei mboroyocui cua re? —jei chupe reta.

Êrei jae reta jei'ā mbae ave. ⁵Pochi reve Jesús umae iyipi rupi ñugüinoi vae reta re, jare tuicha ipiatiti jae reta ipiatanta ramo.

—Eupi ndepo —jei cuimbae pe.

Jayave cuimbae ipo uupi, jare ucuera voi. ⁶Jayave fariseo reta oē judío reta itupao güi, jare uyemboemboe voi herodiano reta ndive Jesús re, quirāita ra uyucaca vaerā.

Jeta uyembati i guasu jembeí pe

⁷⁻⁸Jayave Jesús jare jemimboe reta yugüiraa i guasu pe, jare yugüiraa vi jaicue jeta Galilea güi. Jare yugüeru vi jae oī vae pe jeta Judea pegua reta, Jerusalén pegua reta, ivi Idumea pegua reta, Jordán jovalcho pegua reta, jare tenta guasu Tiro jare Sidón iyipi rupigua reta, uyandu yave opaete Jesús uyapo vae regua. ⁹Jare Jesús oyocui jemimboe reta umicuatíro chalana jae oī vaerā pipe, agüiye vaerā oyopi yati vae reta. ¹⁰Echa'ā jae umbigüera ma jeta vae, jare opaete íru imbaerasi vae reta uñemíañamiaña yugüeru icoti. Echa'ā uipota oya jese, uyavíqui vaerā.

¹¹Jare aña reta uecha Jesús yave, uyeatica jae jovai jare iñeeáta reve jei:

—Nde co jae Tumpa Tai.

¹²Jare Jesús oyocui ete:

—Agüiye pemimbeu quía co che.

Jesús uiparavo doce cuimbae reta
(Mt 10.1-4; Lc 6.12-16)

¹³Jayave Jesús oo ivitu guasu re, jare ueni jae uiparavo vae retaño. Jare jae reta yugüeru jae oī vae pe. ¹⁴Jare jocua reta güi uiparavo doce cuimbae

reta umiíru vaerã. Jae omondota reta umimbeu vaerã Tumpa iñee. ¹⁵Umeeta vi chupe reta mbaepuere umbigüera vaerã imbaerasi vae reta jare umbisiri vaerã aña reta oya jese vae reta güii. ¹⁶Cua co jae uiparavo vae reta jee: Simón (Jesús umbijee Pedro), ¹⁷jare Zebedeo tai reta Jacobo jare Juan jee vae (Jesús umbijee cua mocui reve Boanerges. Cua jee uipota jei: “Ara jiapu vae rami”), ¹⁸jare Andrés, Felipe, Bartolomé, Mateo, Tomás, Alfeo tai Jacobo jee vae, Tadeo, Simón (jae co Zelote pe ueni vae), ¹⁹jare Judas Iscariote (cua cuimbæ umee Jesús jovaicho reta pe). Jayave Jesús ou ye jenta pe jae reta ndive.

Jei reta icavi mbae vae Espíritu Santo coti

(Mt 12.22-32; Lc 11.14-23; 12.10)

²⁰Jare uyembati ye jeta vae. Jáeramo Jesús jare jemimboe reta iquíilã ucaru vaerã. ²¹Jesús jentará reta cua uicuua yave, yugüeru güiraa vaerã tẽi. —Iyaracua'a ma oĩ —jei reta.

²²Jare mboroyocui re oporomboe vae yugüeru Jerusalén güii vae reta jei: —Aña guasu Beelzebú jee vae oya ma jese, jare aña guasu imbaepuere pe umbisiri aña reta oya jese vae reta güii —jei reta.

²³Jayave Jesús ueni reta, jare jei chupe reta umijaanga reve:
—Ndaraus Satanás jaei uyembisiri cuimbæ güii. ²⁴Penti tenta guasu pegua reta oyovaicho uyupii yave, opata co jocua tenta guasu. ²⁵Jae ramiño vi penti tenta pegua reta oyovaicho uyupii yave, opata co jocua tenta. ²⁶Jare Satanás pochi iyupe yave, jare imbaepuere uyembiyao yave, ndaraus tẽi ma ico. Opata tẽi co —jei chupe reta—. ²⁷Ime yave quía uipota uique cuimbæ ipiräta vae jenta pe upíro vaerã imbaembæ chugüi vae, uipocuata rani cuimbæ ipiräta vae. Jayave ramo ipuereta upíro imbaembæ chugüi —jei—.

²⁸Añete che jae peve, opaete ivi pegua reta imbaeyoa reta jare opaete iñee icavi mbae Tumpa coti jei reta vae Tumpa ipuere umbai. ²⁹Érei Tumpa ndaraus etei umbiasa jei icavi mbae vae Espíritu Santo coti vae pe. Uyembijecota jaeño mai pegua —jei chupe reta.

³⁰Echa'a tenonde yave jae reta jei:

—Aña oya ma jese.

Jáeramo Jesús jei jucuarãi chupe reta.

Jesús ichi jare tivi reta

(Mt 12.46-50; Lc 8.19-21)

³¹Jayave Jesús ichi jare tivi reta yugüeru uvâe Jesús oĩ vae pe, jare oca güii omondo uenica. ³²Jare uguapi ñugüinói iyipi rupi vae reta jei chupe: —¡Aipo! Ndesi jare nderivi reta oca pe ñugüinói, jare ndereca.

³³—¿Quía nunga pa co jae chesi jare cherivi reta? —jei Jesús chupe reta.

³⁴Jayave umae iyipi rupi uguapi ñugüinói vae reta re.

—Cua nunga reta co jae chesi jare cherivi reta —jei—. ³⁵Echa'a Tumpa jei vae uyapo vae reta co jae cherivi jare cherindí jare chesi —jei.

Jesús umijaanga umaeti vae
(Mt 13.1-9; Lc 8.4-8)

4 ¹Jesús umbipi ye oporomboe i guasu jembei pe. Jayave jeta yugüeru uyembati jae oĩ vae pe. Jáeramo Jesús uyupi penti chalana i guasu pe oĩ vae pe, jare uguapi pipe. Jare yati vae reta ñugüinoi i guasu jembei pe.

²Jare Jesús omboe reta jeta mbaembae re umijaanga reve. Jei chupe reta:

—Piyapisaca cheré. Penti cuimbae oo umaeti vaerä —jei—. ⁴Umaeti yave, umiai temiti, jare amocue oa tape rupi. Jayave yugüeru güira reta opa jou —jei—. ⁵Íru temiti oa mboviño ivi itape iárambo oĩ vae pe. Cua imambae oẽ, jeta'ã ivi chupe ramo. ⁶Êrei guarasi jasi yave, ipiru. Jare japo quipe'ã oĩ ramo, utini —jei—. ⁷Íru temiti oa ñanapite pe. Ñana ucuacuaa yave, opa uyuca temiti. Jáeramo temiti ia'ã —jei—. ⁸Jare íru temiti oa ivicavi pe. Cua reta oẽ, jare ucuacuaa, jare fá. Amocue mboviño jää, jare íru jeta catu jää, jare íru jeta ete jää —jei chupe reta. ⁹Jayave Jesús jei chupe reta:

—Uipota uyandu vae tuyapisaca cua ñee re.

Maera Jesús oporomboe umijaanga reve
(Mt 13.10-17; Lc 8.9-10)

¹⁰Mboviño ma upita jae ndive yave, jocua doce uiparavo vae reta jare íru upita vae reta upirandu Jesús pe umijaanga reve jei vae re. ¹¹Jayave Jesús jei chupe reta:

—Amimbeu ma peve Tumpa iporoyocuia regua. Cua uyecuaalä íru vae reta pe. Jáeramo amboe íru vae reta amijaanga reve —jei—. ¹²Cua ayapo agüiye vaerä uicuua cavi, yepe tẽi uecha, jare agüiye vaerä uicuua, yepe tẽi uyandu, jare agüiye vaerä uyerova Tumpa coti, imbaeyoa reta uyembai vaerä —jei.

Umaeti vae uyemijaanga jese vae
(Mt 13.18-23; Lc 8.11-15)

¹³Jayave Jesús jei chupe reta:

—¿Picuaa'ã pa mbae cua amijaanga reve jae peve vae uipota jei vae? Picuaa'ã yave, ¿quiräita pa picuaa mbae opaete amijaanga reve jaeta peve vae uipota jei vae? —jei—. ¹⁴Jocua umaeti vae uyemijaanga Tumpa iñee umimbeu vae re —jei—. ¹⁵Temiti tape rupi oa vae uyemijaanga amocue Tumpa iñee uyandu vae re. Êrei jupivoiño ou Satanás, jare umiacaní Tumpa iñee güi —jei—. ¹⁶Jae ramiño vi jocua temiti uñeñotí mboviño ivi itape iárambo oĩ vae pe vae uyemijaanga íru vae reta Tumpa iñee uyandu vae re. Jupivoiño uyerovia reta, jare uipota ete cua ñee. ¹⁷Êrei cua reta jocua temiti japo quipe'ã oĩ vae rami co. Jáeramo imambae icueri reta. Mbaesusere uyeyapo chupe reta ani íru vae reta uyapo icavi mbae vae chupe reta Tumpa iñee uicuua ramo. Jare jupivoiño uipotalä ma uyapisaca reta Tumpa iñee re —jei—. ¹⁸Jae ramiño vi jocua temiti uñeñotí ñanapite

pe vae uyemijaanga ūru vae reta Tumpa iñee uyandu vae re. ¹⁹Ērei jae reta umbipi uyemipia'ā ivi pe mbaembae uyeyapo vae re, jare uyembitavi, uipota icocatu ramo. Uipota vi güinoi jeta mbaembae. Jare opaete cua umiacañi reta Tumpa iñee güii. Jáeramo jae reta jocua temiti ia'ā vae rami co —jei—. ²⁰Ērei jocua temiti uñeñoti ivicavi pe vae uyemijaanga ūru vae reta Tumpa iñee uyandu vae re. Cua reta güirovia. Amocue vae jocua temiti mboviño jāi vae rami co. ūru vae reta jocua temiti jeta catu jāi vae rami co. Jare ūru vae reta jocua temiti jeta ete jāi vae rami co —jei.

Uñeñomi vae uyechacañotai co

(Lc 8.16-18)

²¹Jayave Jesús jei chupe reta:

—Mechero yaruique yave o pe, ndarau ñañono yapepo uyembovapo oī vae igüi pe, ani güirapembí igüi pe. Ñañono co mechero jenda pe —jei—.

²²Ime yave mbae uñeñomi vae, uyechacañotai co. Jae ramiño vi ime yave mbae uyeyasoi vae, uyecuacuuañotai co —jei—. ²³Uipota uyandu vae tuyapisaca cua ñee re —jei Jesús.

²⁴Jare jei chupe reta:

—Pepia pe piyemingueta cavi piyandu vae re. Tumpa umiāangata umee peve pemiaanga pemee ūru vae reta pe rami, jare umiīruta vi peve —jei—. ²⁵Echa'ā güinoi vae pe uñemiīruta, jare mbaeti güinoi vae güi mbovi ete güinoi vae uyeequita —jei.

Jesús umijaanga temiti ucuacuua vae

²⁶Jare Jesús jei chupe reta:

—Tumpa iporoyocuia penti cuimbae oo umaeti vae rami co —jei—.

²⁷Cuimbae oque pītu yave, jare upūa cōe yave. Temiti oē jare ucuacuua, jare umaeti vae uicuaal'ā quirāi ra ucuacuua vae. ²⁸Echa'ā temiti ucuacuua yambori mbae reve, tenonde ii, jayave avatiqui, joco güii avati —jei—. ²⁹Jare yagüiye ma yave, iya uaviro. Echa'ā uvāe ma ara uaviro vaerā —jei chupe reta.

Jesús umijaanga mostaza jāicue

(Mt 13.31-32; Lc 13.18-19)

³⁰Jare Jesús jei:

—¿Mbae ra ipuere uyemijaanga Tumpa iporoyocuia re? ¿Mbae ra yamijaangata jese? —jei—. ³¹Yandepuere yamijaanga jese penti mostaza jāicue —jei—. Uñeñoti yave, cua jāicue michi-rai ete opaete ūru temiti reta jāicue ivi pe oī vae güii. ³²Ērei uñeñoti yave, ucuacuua, jare tuicha ete opaete ūru temiti penti año peguaño ucuacuua vae reta güii, jare tuicha jāca uyeyapo. Jáeramo güira reta ipuere uyapo jaitirā jese guarasña pe —jei chupe reta.

Maera Jesús umijaanga mbaembae
(Mt 13.34-35)

³³Jeta cuarāi Jesús umimbeu Tumpa iñee chupe reta umijaanga reve, jae reta ipuere uicuaa rupiño. ³⁴Jare jecuaeño imiari chupe reta umijaanga reve. Êrei jemimboe reta peño uicuaaca cavi mbae uipota jei vae.

Jesús umiquíi i guasu
(Mt 8.23-27; Lc 8.22-25)

³⁵Jocua ara guarasi uique ma yave, Jesús jei jemimboe reta pe:
 —Yaa i guasu jovaicho pe —jei.

³⁶Jayave jae reta ueya yati vae reta, jare güüraa Jesús jocua chalana oī pipe vae pe. Jare ūru vae reta yugüüraa vi ambié chalana reta pipe. ³⁷Jare ou ivitu tanta uyepeyu, jare i uyembiaparoaraoa uique chalana pe, jare umitinee seri ma. ³⁸Jare Jesús uñemiäcanita chalana iyapi pe, jare oque oī. Jayave jae reta omomba jare jei chupe:

—¡Oporomboe vae! ¿Ndepia'ā pa opata ma ñamano?

³⁹Jayave Jesús upúa, jare uñeengata ivitu pe.

—¡Epita! ¡Nequíi! —jei i guasu pe.

Jare ivitu javoi upita, jare opaete quii ngatu. ⁴⁰Jayave Jesús upirandu chupe reta:

—¿Maera pa pequiye? ¿Ndeiño pa pepurugüirovia? —jei.

⁴¹Jare uquiye ete reta, jare jei uyupe:

—¿Mbae nunga cuimbae pa cua? Ivitu jare i guasu uyapo jae oyocui vae —jei reta.

Gadara peguaaña oya jese vae
(Mt 8.28-34; Lc 8.26-39)

5 ¹Jayave yugüüraa uvae i guasu jovaicho pe, gadareno reta iiví pe. ²Jesús ugüeyi chalana güi rupive, ou ooväiti teögüerirurenda güi penti cuimbae aña oya jese vae. ³Jae ico teögüerirurenda rupi, jare ipuere'ā ma quía uñapíti, yepe tēi uñapíti cadena pe. ⁴Jeta vese ma jae reta uipocua tēi ipo jare ipi cadena pe. Êrei jae opa omondoo cadena reta. Jare ipuere'ā quía jese. ⁵Jare jecuaeño pítu rupi jare ara rupi oī teögüerirurenda rupi jare ivitu guasu rupi, jare jecuae usapicai jare uyembipere ita pe. ⁶Cua cuimbae uecha yave Jesús mbiri güi, osi ou icotí jare uyeatica jovai. ⁷Jare iñeeäta reve jei:

—¿Maera pa ndeyu chemambeco, Jesús? Nde co jae Tumpa ara pe oī vae Tai. Ayerure ndeve Tumpa jee re agüiye iporaraca cheve —jei.

⁸Echa'ā Jesús jei aña pe:

—Esiri cua cuimbae güi, aña.

⁹Jayave Jesús upirandu chupe:

—¿Mbae pa nderee?

—Cheree co jae jeta vae. Echa'ã jeta vae co ore —jei chupe.

¹⁰Jare aña reta uyerure Jesús pe agüiye vaerã umbisiri reta jocua iví güi. ¹¹Jare joco pe jeta cuchi reta ucaru ñugüinoi coiño ivitu guasu güi.

¹²Jayave aña reta uyerure Jesús pe:

—Oremondo pea cuchi reta coti. Emaeño oreré ndoya vaerã jese reta —jei reta.

¹³Jayave Jesús umaeño jese reta. Jare aña reta usirí cuimbae güi, jare oya cuchi reta re. Jayave cuchi reta tanta osi ivia rupi oa i guasu pe, jare joco pe opa ipitupa reta. Cuchi reta uyepapa dos mil rupi.

¹⁴Jayave cuchi iyandarecoa reta opa osi, jare umimbeu tenta guasu pegua reta pe jare jocoropi ñugüinoi vae reta pe cua uyeyapo vae regua. Jare uyandu vae reta yugüeru, uecha vaerã mbae uyeyapo vae. ¹⁵Jare yugüeru uväe yave Jesús oĩ vae pe, uecha cuimbae aña oyase jese vae uguapi oĩ joco pe. Uecha uyemonde ma jare iyaracuaño ma oĩ. Jae co tenonde yave jeta aña reta oyase jese vae. Jare opaete yugüeru vae reta uquiyé. ¹⁶Jare jocua tenonde yave uecha vae reta umimbeu īru reta pe quirái uyeyapo cuimbae aña oyase jese vae pe jare cuchi reta pe. ¹⁷Jayave yati vae reta umiñera Jesús oo ye vaerã jae reta iivi güi. ¹⁸Jare Jesús uyupi ye ma oĩ yave chalana pe, jocua cuimbae aña reta oyase jese vae uyerure chupe:

—Emaeño cheré aa vaerã nderupié —jei.

¹⁹Ērei Jesús umaeño'ã jese.

—Ecua nerenta pe emimbeu nerentará reta pe mbae icavi vae ndeYa uyapo ndeve vae, jare quirái ndeparareco vae —jei chupe.

²⁰Jayave cuimbae oo, jare umbipi umimbeu iví Decápolis jee vae rupi mbae icavi vae Jesús uyapo chupe vae. Jare opaete ipiacañi jese.

Jairo tayı jare cuña Jesús jemimonde uyavíqui vae

(Mt 9.18-26; Lc 8.40-56)

²¹Jesús oo uväe yave i guasu jovaicho coti chalana pipe, yugüeru jeta vae reta jae oĩ vae pe. Jare Jesús upita i guasu jembei pe. ²²Jayave ou penti cuimbae Jairo jee vae. Jae co judío reta itupao re uyandareco vae. Uecha yave Jesús, uyeatíca jovai. ²³Jare uyerure chupe:

—Cherayi umanota ma oĩ —jei—. Yaa iñono ndepo jese embigüera, agüiye vaerã umano —jei chupe.

²⁴Jayave Jesús oo voi jupié. Jare jeta yuguíraa Jesús jupié, jare oyopi reta. ²⁵Jare jae reta ipite pe oo penti cuña doce año ma uiporara tugüiguasu vae. ²⁶Jare uiporara ma jeta upurupiáno vae reta uipíano tẽi reve, jare opaete ma icorepoti umee iyugüi upurupiáno vae reta pe. Ērei ucuera'ã. Jeseve jeiteño ma imbaerasi. ²⁷Jae uyandu Jesús regua yave, oya Jesús re icupe coti jeta vae reta ipite rupi, jare uyavíqui jemimonde.

²⁸—Yepe tẽi jemimondeño tayavíqui, acuerata co —jei.

²⁹Jare jupivoiño jugüiguasu upita chugüi, jare uyandu jete ucuera ma imbaerasi güi. ³⁰Jayave Jesús uicuua umbigüera ma co quía imbaepuere pe. Jáeramo uyerova umae jeta vae re, jare upirandu:

—¿Quía pa cheremimonde uyaviquí?

³¹Jayave jemimboe reta jei chupe:

—Ndeecha co cua jeta vae reta ndeopi ñugüinoi. ¿Maera pa ndepirandu: ‘Quía pa cheremimonde uyaviquí’? —jei reta chupe.

³²Erei Jesús umae iyípi rupi, uecha vaerá quía ra jucuarái uyapo. ³³Cuña uicuua uyeyapo ma chupe vae, jare ou icoti. Uquíye güi uriri, jare uyeatica Jesús jovai, jare umimbeu chupe opaete uyeyapo ma vae. ³⁴Jayave Jesús jei chupe:

—Ndecuera ma, cherindi, nderovia cheré ramo. Ecua ndepíacatu reve. Ndecuera ma co nembaserí güi —jei.

³⁵Jare Jesús uyemingueta oī rambueve, yugüeru uvāe amocue vae tupao re uyandareco vae jenta güi. Jare jei reta Jairo pe:

—Nderayí umano ma. Agüiye ma emambeco oporomboe vae —jei reta chupe.

³⁶Erei Jesús cua uyandu yave, jei tupao re uyandareco vae pe:

—Agüiye ndepíatiti. Epurugüiroviaño —jei.

³⁷Jare umaeñolá ūru reta re yugüiraa vaerá jae ndive, jaeño Pedro, Jacobo jare Juan. Juan co jae Jacobo tiví. ³⁸Yugüiraa uvāe yave tupao re uyandareco vae jenta pe, Jesús uecha jeta vae reta icorai jare uyao ñugüinoi reta jāse reve. ³⁹Jesús uique yave o pe, jei chupe reta:

—¿Maera pa picorai jare piyao? Cua cuñatai umano'ā co. Oqueño co oī —jei.

⁴⁰Erei jae reta oyoyai. Jayave Jesús omoē opaete vae oca pe, jare uruique cuñatai oī vae pe cuñatai tu jare ichi, jare jemimboe jae ndive yugüiraa vae reta. ⁴¹Jayave Jesús uipisi cuñatai ipo pe.

—Talita cumi —jei chupe. (Cua uipota jei: “Cuñatai, che jae ndeve, epūa”.)

⁴²Jayave cuñatai upūa jare umbípi uguata. Cua cuñatai doce año ma güinoi. Jare Jesús ndive ñugüinoi vae reta ipiacañi ete. ⁴³Jayave Jesús oyocui ete reta agüiye vaerá umimbeu quía pe ave, jare oyocui vi umingaru vaerá cuñatai.

Jesús Nazaret pe

(Mt 13.53-58; Lc 4.16-30)

6 ¹Jesús oo joco güi iivi pe, jare jemimboe reta yugüiraa jupié.

²Jayave mbutuu ara pe Jesús umbípi oporomboe judío reta itupao pe. Jare jeta vae uyapisaca jese, jare ipiacañi reta. Jei reta uyupe:

—¿Quiape ra uyemboe cua cuimbae opaete cua re? ¿Mbae nunga aracuua ra uñemee chupe? ¿Mbae nunga miacañi ra cua uyapo ipo pe vae? —jei reta—. ³Cua co jae carpintero. Jae co María imembí. Jae co Jacobo, José, Judas jare Simón tiquei. Jare jindi reta yugüireco vi yandepite pe —jei reta.

Jáeramo jae reta pochi Jesús pe. ⁴Jayave Jesús jei chupe reta:

—Opaete vae uipiù penti Tumpa iñee umimbeu vae. Jaeño jentaigua reta, jentará reta jare jenta pegua reta uipiú'ā reta —jei.

⁵Jare joco pe ipuere'ã uyapo jeta miacañi. Jaeño oñono ipo mboví imbaerasi vae reta re umbigüera vaerã. ⁶Jare Jesús ipiacañi jese reta, güürovia'ã jese ramo. Jayave Jesús oo oporomboe īru tenta guasu-raí jocoropi ñugüinoi vae reta rupi.

Jesús omondo jocua doce jemimboe reta
(Mt 10.5-15; Lc 9.1-6)

⁷Penti ara Jesús umbati jocua doce jemimboe reta, jare omondo mocui mocui rupi, jare umee chupe reta mbaepuere umbisiri vaerã aña reta oya jese vae reta güi. ⁸Jare oyocui:

—Peo yave, agüiye mbae peraa, jaeño pepopoca. Agüiye peraa peurupucu, perembürä jare corepoti —jei chupe reta—. ⁹Pemonde pepipasa, jare agüiye peraa mocui camisa —jei.

¹⁰Jare jei vi chupe reta:

—Peo pevæe yave penti tenta pe, joco pe peí, jocua tenta guasu güi peo ye regua —jei—. ¹¹Jare ime yave penti tenta guasu pegua reta uipota'ã pepita vaerã joco pe jare uipota'ã uyapisaca peré vae, pecuaño joco güi, jare pemítimo ívícuí pepi güi, uicuua vaerã jae reta co teco güünoi —jei—. Añete che jae peve, Tumpa uāa yave ívi pegua reta, jocua tenta guasu pegua reta tanta uiporarata Sodoma jare Gomorra pegua reta güi —jei.

¹²Jayave jae reta yugüiraa, jare umimbeu īru vae reta pe:

—Peeya piyeminguela icavi mbae vae pepia pe oí vae.

¹³Jare jae reta umbisiri jeta aña reta oya jese vae reta güi, jare jeta imbaerasi vae reta re oñono aceite umbigüera vaerã.

Juan imano
(Mt 14.1-12; Lc 9.7-9)

¹⁴Opaete vae uyandu ma Jesús regua. Mburuvicha guasu Herodes jee vae uyandu vi. Jae jei:

—Juan upurumbibautizase vae icove ye ma ou umanocue vae reta ipite güi. Jáeramo uyapo cua miacañi reta —jei.

¹⁵Īru vae reta jei:

—Jae co Elías.

Jare īru vae reta jei:

—Jae co penti Tumpa iñee umimbeu vae Tumpa iñee aracae umimbeu vae rami.

¹⁶Ērei Herodes uyandu yave, jei:

—Jae co Juan añacasiaca vae. Icove ye ma ou umanocue vae reta ipite güi —jei.

¹⁷Echa'ã ndei Juan umano mbove, Herodes umenda Felipe jembireco Herodías jee vae ndive. Felipe co jae Herodes tivi. Jayave Herodes omondo uipísica Juan, jare oñonoca peresoriru pe, Herodías jei ramo. ¹⁸Echa'ã tenonde yave Juan jei Herodes pe: “Icaví'ã nemenda vaerã nderívi jembireco ndive.”

¹⁹ Jáeramo Herodías pochi Juan pe, jare uipota tēi uyucaca, ērei ipuere'ā.
²⁰ Echa'ā Herodes uicuaa Juan co jae cuimbae jupi vae. Jáeramo uipiu, jare umaeño'ā quía re uyapo vaerā icavi mbae vae chupe. Jare uyandu yave Juan jei vae, uyemipiāl'ā tuicha. Ērei jecuaeño uipota uyapisaca jese. ²¹ Ērei uvāe ara Herodías uyapo vaerā icavi mbae vae Juan pe. Jocua ara Herodes uyembiara oa vae regua, jare umbatíca īru mburuvicha reta, sundaro reta juvicha reta, jare icocatu vae reta Galilea pegua, umingaru vaerā. ²² Jare Herodías imembī cuña uique upirae yave, umbiyerovia Herodes jare jae ndive ucaru ñugüinoi vae reta. Jayave Herodes jei cuñatai pe:

—Eeca cheve mbae ndipota vae, jare che ameeta ndeve —jei.

²³ Jare jei ye chupe Tumpa jee re:

—Ipotave mbae ndeeca cheve vae ameeta co ndeve, cheivī mbite rupi yepe.

²⁴ Jayave cuñatai oẽ oo upirandu ichi pe:

—¿Mbae pa aecata chupe?

—Eeca chupe Juan upurumbibautizase vae iñaca —jei ichi chupe.

²⁵ Jayave imambaeño cuñatai uique ye mburuvicha guasu oĩ vae pe.

—Aipota nemee vaerā cheve añave voi Juan upurumbibautizase vae iñaca penti plato pe —jei chupe.

²⁶ Jayave mburuvicha guasu ipiatiti tuicha. Ērei Tumpa jee re jei chupe ramo, jare īru vae reta uyandu ramo, uipotal'ā uicuacu iñee. ²⁷ Jáeramo omondo sundaro Juan iñaca güeru vaerā. ²⁸ Jayave oo sundaro peresoriru pe uñäcasia Juan. Jare güeru iñacacue penti plato pe, jare umee cuñatai pe. Jayave jae umee ichi pe. ²⁹ Jare Juan jemimboe reta cua uicuaa yave, yugüeru güiraa jetecue oñotí vaerā.

Jesús umingaru cinco mil cuimbae reta

(Mt 14.13-21; Lc 9.10-17; Jn 6.1-14)

³⁰ Jesús jemimondo reta uyembati ye yave jae ndive, umimbeu reta chupe opaete uyapo vae jare oporomboe jese vae. ³¹ Jayave Jesús jei chupe reta:

—Pe retaño peyu yaa quii ngatu vae pe, peputuu vaerā michi pegua —jei.

Echa'ā jecuaeue jeta vae yugüeru opou ipi. Jáeramo Jesús jare jemimboe reta iquii'ā ucaru vaerā. ³² Jayave jae retaño yugüiraa chalana pe quii ngatu vae pe. ³³ Ērei jeta vae reta uecha yugüiraa, jare uicuaa quía co jae vae. Jare yugüiraa ivi rupiño tenta guasu reta güi Jesús oo vae pe, jare yugüiraa uvāe ndei Jesús oo uvāe mbove, jare uyembati joco pe. ³⁴ Jesús ugüeyi yave chalana güi, uecha jeta vae, jare uiparareco reta. Echa'ā jae reta ovecha mbaeti iyandarecoa güinoi vae reta rami co. Jare umbipi omboe reta jeta mbaembae re.

³⁵ Caaru ma yave, Jesús jemimboe reta yugüeru jei chupe:

—Mbaeti quiave ico cua rupi, jare caaru ma oĩ. ³⁶ Emondo cua reta ogua vaerā jemburā tenta tenta rupi. Echa'ā mbaeti mbae jou reta vaerā cua pe —jei reta.

³⁷ Êrei Jesús jei chupe reta:

—Pe reta pemee tucaru.

—¿Ndoota pa ndogua doscientos ara mbaravíqui jepi pegua mbiyape, numee jou reta vaerã? —jei reta chupe.

³⁸ Jesús jei chupe reta:

—¿Mbovi pa mbiyape ime penoi? Pecua peeca —jei.

Jae reta uicuua ma yave, umimbeu Jesús pe:

—Ime nonoi pandepo mbiyape jare mocui pira —jei reta.

³⁹ Jayave Jesús oyocui opaete vae uyembatimbati vaerã uguapi capiichape re. ⁴⁰ Jayave uyembatimbati reta uguapi cien rupi jare cincuenta rupi. ⁴¹ Jayave Jesús uiipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisãa mbiyape, jare umee jemimboe reta pe, jae reta umee vaerã yati yati ñugüinoini vae reta pe. Jesús upisãa vi jocua mocui pira, uñemee vaerã opaete vae pe. ⁴² Opareve ucaru, jare iyangapii reta. ⁴³ Jayave Jesús jemimboe reta umbati tembíu uñepisãacue jembire vae, jare umitinee doce canasta. ⁴⁴ Jare ucaru vae reta giui cuimbae retaño uyepapa cinco mil.

Jesús uguata i íárambo

(Mt 14.22-27; Jn 6.16-21)

⁴⁵ Jare jupivoiño Jesús oyocui jemimboe reta uyupi vaerã chalana pe, jare yugüiraa vaerã jenonde i guasu jovalcho pe tenta guasu Betsaida pe, jae omondo rambueve uyembati vae reta. ⁴⁶ Jare opa omondo yave, Jesús uyupi ivitu guasu re uyerure vaerã Tumpa pe. ⁴⁷ Pitu ma yave, jemimboe reta yugüiraa chalana pe i guasu mbite rupi, jare Jesús jaé upita ivi pe. ⁴⁸ Jare Jesús uecha tanta ma uparavíqui reta, uruguata vaerã chalana. Echa'ã ivitu tanta ooväiti. Jare cöeta ma yave, Jesús uguata oo i íárambo rupi güiraa uepiti. Jare uasata tēi chugüi reta. ⁴⁹ Jae reta uecha yave uguata oo i íárambo rupi, ipia pe uyeminguela tēi uecha mbae iäcue, jare usapicai reta. ⁵⁰ Echa'ã opaete jae reta uecha, jare uquiyé ete reta. Êrei jupivoiño Jesús ombou iñee chupe reta:

—Piñemiatangátu. Che co. Agüiye pequiyé —jei.

⁵¹ Jayave Jesús ou uyupi chalana pe, jare upita ivitu. Jare jae reta ipiacani. ⁵² Echa'ã jocua miacañi mbiyape regua uyapo yave, Jesús uiporta tēi jae reta uicuua cavi vaerã. Êrei ndeiño uicuua. Echa'ã jecuaeño ipiatanta.

Jesús umbigüera Genesaret pegua imbaerasi vae reta

(Mt 14.34-36)

⁵³⁻⁵⁴ I guasu uasa reta yave, yugüiraa uväe ivi Genesaret pe. Jare ugüeyi reta yave chalana giui i guasu jembei pe, jupivoiño joco pegua reta uicuua jae co Jesús vae. ⁵⁵ Jare yugüiraa opaete jocua ivi rupi, jare umbipi güeru imbaerasi vae reta jupa reve Jesús oí vae pe. Íru vae reta umimbeu chupe reta quiape oí vae. ⁵⁶ Jare Jesús oo tenta guasu-rai reta rupi, jare tenta guasu reta rupi, jare tenta ñana rupi ñugüinoini vae reta pe. Jare oo vae rupi joco pegua reta güeru oñono imbaerasi

vae reta tape rupi, jare uyerure Jesús pe umaeño imbaerasi vae reta uyavíqui vaerā jemimonde jembei yepe. Jare opaete uyavíqui vae reta ucuera.

Yandepia uminguia vae
(Mt 15.1-20)

7 ¹Fariseo reta jare amocue mboroyocui re oporomboe vae Jerusalén güi yugüeru vae reta uyembati Jesús oí vae pe. ²Jae reta uecha amocue Jesús jemimboe reta ucaru ñugüinoi uyepoe mbae reve. Echa'ã jae reta uyapo velã ma itenondegua reta iporomboe. Jáeramo umbijeco reta. ³Echa'ã fariseo reta jare opaete judío reta uyepoëñoi ndei ucaru mbove, uyapo vaerā itenondegua reta iporomboe. ⁴Jare yugüeru ye yave umaemee vae reta ñugüinoi vae güi, jecuaeño uyepoe ndei ucaru mbove. Jare uyapoñoi reta jeta íru mbaembae itenondegua reta iporomboe. Echa'ã oyoe vaso reta, yapepo reta, paila reta jare tupu reta.

⁵Jayave fariseo reta jare mboroyocui re oporomboe vae reta upirandu Jesús pe:

—¿Maera pa nderemimboe reta uyapo'ã yandetenondegua reta iporomboe? ¿Maera pa ucaru reta uyepoe mbae reve? —jei reta.

⁶Jayave Jesús jei chupe reta:

—Añete yepe Isaías imiari peré. Echa'ã jae uicuatía upurumbítavi vae reta re cuarāi:

‘Cua reta chepiu iyuru peño’ —jei Tumpa—.

‘Erei ipia pe chepiu'ã etei.

⁷Chembiadora-raangaiño.

Che jucuarāi'ã aporoyocui’ —jei Tumpa.

Jucuarāi uicuatía Isaías —jei Jesús—. ⁸Echa'ã pe reta piyapo'ã Tumpa iporoyocui, ērei piyapo cavi yandetenondegua reta iporomboe. Piyoe yapepo reta jare vaso reta, jare jeta cua nunga piyapo —jei.

⁹Jare Jesús jei chupe reta:

—Tumpa iporoyocui pemombo co, piyapo vaerā yandetenondegua reta iporoyocui. ¹⁰Moisés jei cuarāi: ‘Ipiú nderu jare ndesi.’ Jare jei vi cuarāi: ‘Jei icavi mbae vae tu ani ichi cotí vae uyeyucacata co.’ Jucuarāi jei Moisés —jei chupe reta—. ¹¹Ērei pe reta pere cuarāi: ‘Penti cuimbæ ipuere jei tu ani ichi pe umeeta tēi chupe ombori vaerā vae Corbán co.’ Jucuarāi pere —jei—. (Corbán uipota jei: “Amee ma Tumpa pe”.) ¹²Jayave pe reta pemaëño'ã ma jese ombori vaerā tu jare ichi —jei—. ¹³Jare jeta cua nunga piyapo. Jucuarāi pe reta pemombo Tumpa iporoyocui piyugüi piyapo vaerā yandetenondegua reta iporoyocui. Jare pemboe vi pesambiai reta uyapo vaerā yandetenondegua reta iporoyocui —jei Jesús chupe reta.

¹⁴Jare Jesús ueni umbati opaete joco pe ñugüinoi vae reta.

—Piypisaca cua re opaete pe reta, picuua cavi vaerā —jei chupe reta—. ¹⁵Ipotave mbae peu vae oo perie pe. Jáeramo uminguia'ã pepia. Jocua piyapo vae jare pere vae uminguia pepia —jei—. ¹⁶Uipota uyandu vae tuyapisaca cua ñee re —jei chupe reta.

¹⁷Jare Jesús ueya yati vae reta yave, uique jo pe. Jayave jemimboe reta upírandu chupe umijaanga reve jei vae re. ¹⁸Jayave Jesús jei chupe reta:

—¿Pe retave pa picuaa caviga? Picuaa cavi cua: Ipotave mbae peu vae uminguial'a pepia. ¹⁹Echa'ã oo'ã pepia pe. Oo perie pe jare pemombo. Jucuarai uyeyapo opaete tembú pe —jei chupe reta.

²⁰Jare Jesús jei:

—Jocua piyapo vae jare pere vae uminguia pepia. ²¹Echa'ã pepia güi oẽ opaete icavi mbae vae: pepia pe piyeminguela icavi mbae vae, piyuvanga menda re, piyapo aguasa, pepuruyuca, ²²pemonda, pipota ūru vae reta imbaembae, piyapo icavi mbae vae, pepurumbitavi, pembiquere, peacatāa, icavi mbae vae pere perapicha coti, piyembicate jare pico iyaracuaa mbae vae reta rami —jei—. ²³Opaete cua icavi mbae vae oẽ pepia güi. Jare cua reta uminguia pepia —jei chupe reta.

Cuña sirofenicia pegua ipurugüirovia (Mt 15.21-28)

²⁴Jayave Jesús oo ye joco güi Tiro jare Sidón iyipi rupi. Jare uique yave penti tenta pe, uipota'ã tēi quiave uicuaa vaerā jae joco pe oĩ vae. Ērei uicuaañoi joco pegua reta. ²⁵Jare penti cuña aña oya imembī cuña re vae uyandu Jesús regua, jare ou uyeatica jae jovai. ²⁶Jae co penti sirofenicia griega pe uyemingueta vae. Jae uyerure Jesús pe umbisiri vaerā aña imembī güi. ²⁷Ērei Jesús jei chupe:

—Tiangapii rani sambiai reta. Icavi'ã yaequi vaerā tembú sambiai reta güi, ñamee vaerā yimba-rai reta pe —jei.

²⁸—Añete tēi co, carai —jei cuña Jesús pe—. Ērei yimba-rai mesa igüi pe ñugüinoi vae reta jou tembú usururucue sambiai reta uití vae —jei.

²⁹Jayave Jesús jei chupe:

—Cua ndere vae jeco pegua ndepuere ndeo. Aña usiri ma nemembī güi —jei.

³⁰Jayave cuña oo uvāe jenta pe yave, uecha imembī jupa pe oĩ. Aña usiri ma chugüi.

Jesús umbigüera cuimbae iupaupa jare iyapisa mbae vae

³¹Jayave Jesús ou Tiro iyipi rupigua güi, jare uasa Sidón jare Decápolis rupi, jare ou uvāe i guasu Galilea pe oĩ vae pe. ³²Jare amocue vae güeru chupe penti cuimbae iupaupa jare iyapisa mbae vae. Güeru vae reta uyerure Jesús pe oñono vaerā ipo jese. ³³Jayave Jesús güiraa cuimbae yati vae reta ipite güi. Oñono ipoäca cuimbae iyapisa pe. Jayave undivi, jare uyavíqui cuimbae icū chugüi. ³⁴Jayave umae ara coti, jare iañeequi, jare jei:

—¡Efata! (Cua uipota jei: “¡Iyapea!”)

³⁵Jayave cuimbae uyandu ma, jare icū omi cavi, jare uyemingueta cavi ma.

³⁶Jayave Jesús oyocui reta agüiye vaerā umimbeu quía pe. Ērei yepe tēi oyocui ye ye, jeseve jae reta umimbeuñoi ūru vae reta pe. ³⁷Jae reta ipiacaní ete, jare jei:

—Opaete mbaembae uyapo vae icavi ete co. Umbigüera iyapisa mbae vae reta uyandu vaerā, jare umbigüera vi upa reta uyemingueta vaerā.

Cuatro mil ucaru vae reta

(Mt 15.32-39)

8 ¹Penti ara jeta uyembati yave, mbaeti ma mbae güïnoi reta jou vaerā. Jayave Jesús ueni jemimboe reta.

²—Aiparareco cua yati vae reta —jei—. Echa'ã mbapi ara ma ñugüïnoi che ndive, jare mbaeti ma mbae güïnoi jou vaerā —jei jemimboe reta pe—. ³Amondo yave jenta cotí ucaru mbae reve, ipituta co reta tape rupi. Echa'ã amocue yugüero mbiri güi —jei chupe reta.

⁴—¿Quiräita pa yandepuere ñamee mbiyape chupe reta cua mbaeti quiave ico vae pe? —jei jemimboe reta Jesús pe.

⁵Jayave Jesús upirandu chupe reta:

—¿Mbovi pa mbiyape penoi?

—Ime nonoi siete —jei reta chupe.

⁶Jayave Jesús oyocui yati vae reta uguapi vaerā ivi pe. Jayave uipisi jocua siete mbiyape, jare umee yasurupai Tumpa pe. Jayave upisää mbiyape, jare umee jemimboe reta pe, jae reta umee vaerā yati vae reta pe. Jayave jucuarai uyapo reta. ⁷Jare güïnoi vi mbovi pira michi vae reta. Cua re vi Jesús umee yasurupai Tumpa pe, jare jei jemimboe reta pe cua vi umee vaerā yati vae reta pe. ⁸Opareve ucaru, jare iyangapii reta. Jayave Jesús jemimboe reta umbatí tembíu uñepisääcuae jembire vae, jare umitinee siete canasta. ⁹Jare joco pe ñugüïnoi vae reta uyepapa cuatro mil rupi. Jayave Jesús omundo ye yati vae reta. ¹⁰Jayave jae jare jemimboe reta uyupi chalana pe, jare yugüiraa ivi Dalmanuta jee vae pe.

Fariseo reta uipota uecha miacañi

(Mt 16.1-4; Lc 11.29; 12.54-56)

¹¹Jayave yugüero fariseo reta, jare umbipi uyeaca Jesús ndive.

—Eechaca oreve miacañi ara güi —jei reta chupe.

Jae reta uipota uicuua uyapota ra miacañi chupe reta. ¹²Jayave Jesús iañeequi.

—¿Maera pa añave yugüireco vae reta uipota aechaca vaerā chupe reta miacañi? —jei—. Añete che jae peve, ndarau uyeechaca miacañi cua reta pe —jei chupe reta.

¹³Jayave Jesús ueya reta, jare uyupi ye chalana pe oo i guasu jobaicho pe.

Fariseo reta ilevadura

(Mt 16.5-12)

¹⁴Jare Jesús jemimboe reta ñacañi güero vaerā mbiyape. Pentiño mbiyape güïnoi chalana pe. ¹⁵Jare Jesús jei chupe reta:

—Piñemoa ngatu fariseo reta jare Herodes ilevadura güi.

¹⁶Jayave jemimboe reta jei uyupe:

—Cua jei, yaru'ã mbiyape ramo.

¹⁷Jesús uicuua chugüi mbae jei reta vae, jare jei chupe reta:

—¿Maera pa piyeminguela mbiyape Peru mbae vae re? ¿Ndeiño pa picuua cavi? ¿Tanta mbate pa co pepia? —jei—. ¹⁸Peresa jare peapisa penoi. ¿Peecha'ã pa jare piyandu'ã pa? ¿Pemandua'ã pa? —jei—. ¹⁹Cue yave apisää pandepo mbiyape, ucaru vaerã cinco mil vae reta. Tembíu jembirecue pembati yave, ¿mbovi canasta pa pemitinee? —jei.

—Numitinee doce —jei reta chupe.

²⁰Jare siete mbiyape apisää vi, ucaru vaerã cuatro mil vae reta. Tembíu jembirecue pembati yave, ¿mbovi canasta pa pemitinee? —jei Jesús.

—Numitinee siete —jei reta chupe.

²¹Jayave Jesús jei chupe reta:

—¿Ndeiño pa picuua cavi?

Jesús umbigüera jesa mbae vae Betsaida pe

²²Jare yugüiraa uväe Betsaida pe. Jayave amocue vae güeru Jesús pe cuimbae jesa mbae vae, jare jae reta uyerure chupe oñono vaerã ipo jese.

²³Jayave Jesús uipoco güiraa cuimbae jesa mbae vae tenta guasu güi.

Jayave undiví cuimbae jesa re, jare oñono ipo jese.

—¿Ndepuere pa mbae ndeecha? —jei chupe.

²⁴Cuimbae umae.

—Cuimbae reta aecha —jei Jesús pe—. Úrei ivira reta echa cheve. Úrei aecha uguata ñugüinói —jei.

²⁵Jayave Jesús oñono ye ipo jesa re, uecha cavi vaerã. Jayave ramo uecha cavi opaete mbaembiae. ²⁶Jayave Jesús oyocui:

—Agüiye ecua cua tenta guasu rupi. Jare agüiye emimbeu quía pe ave jocoropi —jei chupe.

Jayave omondo jenta pe.

Pedro jei Jesús co jae Cristo, Tumpa ombou vae

(Mt 16.13-20; Lc 9.18-21)

²⁷Coiño tenta guasu Cesarea Filipo güi ñugüinói amocue tenta guasurái reta. Jocoti yugüiraa Jesús jare jemimboe reta. Jare tape rupi Jesús upirandu jemimboe reta pe:

—¿Quía pa co che íru vae reta pe?

²⁸Jae reta umimbeu chupe:

—Amocue vae jei nde co jae Juan upurumbibautizase vae, jare íru vae reta jei nde co jae Elías, jare íru vae reta jei nde co jae penti Tumpa iñee aracae umimbeu vae —jei reta.

²⁹Jayave Jesús upirandu chupe reta:

—Jare ¿quía pa co che pevے?

Jayave Pedro jei chupe:

—Nde co jae Cristo, Tumpa ombou vae.

³⁰Jayave Jesús oyocui reta agüiye vaerā umimbeu quía pe.

Jesús umimbeu umanota co

(Mt 16.21-28; Lc 9.22-27)

³¹Jayave Jesús umimbeu chupe reta:

—Che cuimbaerā ayeyapo vae jetata co aiporara. Jare tenta guasu pegua reta itenondegua reta, sacerdote reta itenondegua reta, jare mboroyocui re oporomboe vae reta chererírota jare cheyucacata. Ěrei mbapí ara rupi aicove yeta ayu umanocue vae reta ipite güi —jei chupe reta.

³²Cua umimbeu cavi chupe reta. Jayave Pedro güíraa Jesús īru reta ipite güi, jare umbípi umbieta chupe. ³³Ērei Jesús uyerova umae īru jemimboe reta cotí, jare uñeengata Pedro pe.

—Esíri chegüi, Satanás —jei chupe—. Echa'ā nde ndiyeminguela neī ivi pegua reta uyemingueta rami, ndiyeminguela'ā Tumpa uyemingueta rami —jei.

³⁴Jare Jesús ueni jemimboe reta jare īru joco pe ñugüínoi vae reta.

Jayave jei chupe reta:

—Ime yave quía uipota oo cherupíe vae, tiñacañi iyugüi, tovoi icurusu, jare too cherupíe —jei—. ³⁵Uipota uñuvatu jecove vae ndarau ipuere. Ěrei jocua umeeta jecove chereco pegua jare Tumpa iñee icavi vae jeco pegua vae uñuvatuta co —jei—. ³⁶¿Mbae ra uminganata quía, umingana yave opaete ivi pegua, ērei ipuerel'ā yave uñuvatu jecove? ³⁷¿Mbovi ra umbiepita quía ogua ye vaerā jecove? —jei—. ³⁸Ivi pegua añave yugüireco vae reta güirovia'ā Tumpa jare uyapo icavi mbae vae. Ime yave quía imara cheré jare chiñee re cua reta ipite pe vae, che cuimbaerā ayeyapo vae chemarata vi jese, ayu ye yave cheRu imbaepuere reve ángel uñeñono tee Tumpa peguarā vae reta ndive —jei chupe reta.

9 ¹Jesús jei chupe reta: —Añete che jae peve, ndei amocue cua pe ñugüínoi vae umano mbove, uechata reta Tumpa iporoyocuia mbaepuere pegua.

Jesús uyembiambie

(Mt 17.1-13; Lc 9.28-36)

²Seis ara ma uasa yave, Jesús güíraa Pedro, Jacobo jare Juan īru reta ipite güi penti ivitu guasu ivate vae re, jare joco pe uyembiambie jae reta jovai. ³Jemimonde umbípi uvera jare tī asi. Mbaeti penti ave umbaepuera vae ipuere umití asi jucuarāi. ⁴Jare uyecuua chupe reta Elías jare Moisés uyemingueta ñugüínoi Jesús ndive. ⁵Jayave Pedro jei Jesús pe:

—Oporomboe vae, icavi co ñaí vaerā cua pe. Nduyapota mbapí guarasíia ñanaroqui pegua, penti nembaerā, penti Moisés peguarā jare penti Elías peguarā —jei.

⁶Echa'ã Jesús jemimboe reta uquiye ete, jare Pedro uicua'a mbae jei vaerã.

⁷Jayave ou amapitu umiguarasña reta, jare amapitu güi uyendu ñee jei:

—Cua co jae cheRaí aau ete vae. Piyapisaca jese —jei.

⁸Jare aramoño umae reta yave, uecha'ã ma quía jae reta ndive, jaeño Jesús.

⁹Jare ivitu guasu güi ugüeyi yugüeru rambueve, Jesús oyocui reta:

—Agüiye pemimbeu quía pe cua pеechа vae, ndei che cuimbaerã ayeyapo vae aicove ye ayu umanocue vae reta ipite güi mbove —jei chupe reta.

¹⁰Jáeramo umimbeu'ã quía pe, érei upirandu reta uyupe:

—¿Mbae pa uipota jei cua umimbeu yandeve vae? ¿Quiräita pa icove ye ou umanocue vae reta ipite güi? —jei reta.

¹¹Jayave jae reta upirandu Jesús pe:

—¿Maera pa jei mboroyocui re oporomboe vae reta Elías rani co outa?

¹²—Añete Elías rani co outa —jei Jesús chupe reta—, jare opaete uyapicatuta. Jare ¿mbae ra uyequatía oī Tumpa iñee pe che cuimbaerã ayeyapo vae re? Uyequatía oī che jetata aiporara jare íru vae reta chererirota —jei—. ¹³Érei che jae peve, Elías ou ma co, jare amocue vae uyapo chupe jae reta uipota vae, Tumpa iñee pe uyequatía oī rami —jei chupe reta.

Jesús umbigüera cunumi aña oya jese vae

(Mt 17.14-21; Lc 9.37-43)

¹⁴Jare yugüeru uväe yave íru jemimboe reta ñugüinoi vae pe, uecha jeta yati ñugüinoi iyipi rupi, jare mboroyocui re oporomboe vae reta uyeaca ñugüinoi jae reta ndive. ¹⁵Jayave opaete joco pe ñugüinoi vae reta uecha Jesús, jare ipiacañi reta. Jayave osi yugüeru reta icoti, jare umbisaluda reta. ¹⁶Jayave Jesús upirandu chupe reta:

—¿Mbae re pa piyeaca peí jae reta ndive?

¹⁷Jayave penti cuimbae yati vae reta ipite pe oī vae jei chupe:

—Oporamboe vae, aru ndeve cherai. Aña oya jese jare umbuupa —jei—. ¹⁸Jare que rupi oī vae pe aña oya jese yave, joco pe umbiriri, jare cunumi iyuru tiriayi, jai umbiquiriru jare jete opa uñemitanta —jei—. Ayerure tēi ma nderemimboe reta pe umbisiri vaerã aña chugüi, érei ipuere'ã reta —jei cuimbae Jesús pe.

¹⁹Jayave Jesús jei chupe reta:

—Pe reta cua ivi pe pico vae pepurugüirovia'ã. ¿Quiräi regua ra apitata pe reta ndive? ¿Quiräi regua ra arupiata peve? Peru cheve cua pe jocua cunumi —jei.

²⁰Jayave güeru chupe, jare aña uecha yave Jesús, jupivoño umbiriri tanta jocua cunumi jare oa ivi re. Uyapayere, jare iyuru tiriayi. ²¹Jayave Jesús upirandu tu pe:

—Quiräi yave ma pa uyeyapo chupe cua?

—Michi güive uyeyapo chupe —jei tu—. ²²Jare jeta vese ma uití tata pe jare i pe, uyuca vaerã tēi. Érei nde ndepuere yave mbae ndiyapo chupe, oreparareco jare orembori —jei chupe.

²³Jayave Jesús jei chupe:

—¿Ndepuere pa ndepurugüirovia? Upurugüirovia vae ipuere uyapo opaete mbaembae —jei.

²⁴Jayave cunumi tu iñeeäta reve jei:

—Ndugüirovia. Apurugüirovia'ã yave, chembori apurugüirovia vaerã —jei.

²⁵Jare Jesús uecha yave jeta vae uyembati joco pe, uñeengata aña pe.

—Aña upurumbuupa jare upurumbiapisa mbae vae, che ndoyocui

ndesiri vaerã cua cunumi güi, jare agüiye etei ma eya ye jese —jei aña pe.

²⁶Jare aña jäse ma yave, umbiriri tanta cunumi, jare usiri chugüi. Jare cunumi umano echa upita. Jare jeta joco pe ñugüinpoi vae reta jei tëi:

—Umano ma.

²⁷Êrei Jesús uipisi cunumi ipo pe, jare umupüa. Jare cunumi uyemboi.

²⁸Jare Jesús uique yave penti o pe, jemimboe reta upirandu chupe, jae retaño jae ndive ñugüinpoi yave:

—¿Maera pa ore orepuere'ã numbisiri aña?

²⁹—Ndaraupepuere pembisiri cua nunga aña, jaeño piyerure yave Tumpa pe piyecuacu reve tembíu güi —jei Jesús chupe reta.

Jesús umimbeu ye umanota co

(Mt 17.22-23; Lc 9.44-45)

³⁰Jesús jare jemimboe reta yugüiraa yave joco güi, uasa Galilea rupi. Jare Jesús uipota'ã quía uicuua vaerã. ³¹Echa'ã omboe güinpoi jemimboe reta.

—Che cuimbaerã ayeyapo vae penti vae chemeeta ñru vae reta pe. Jae reta cheyucata —jei chupe reta—. Êrei amano ma yave, mbapi ara rupi aicove yeta ayu umanocue vae reta ipite güi —jei.

³²Êrei jae reta uicuua cavi'ã mbae re ra Jesús umingueta vae, jare uipiù reta upirandu vaerã chupe jese.

¿Quía ra tenondegua ñru reta güi vae?

(Mt 18.1-5; Lc 9.46-48)

³³Jayave yugüiraa uväe Capernaum pe. Jare jenta pe oï yave, Jesús upirandu jemimboe reta pe:

—¿Mbae re pa piyemingueta peyu tape rupi?

³⁴Êrei jae reta iquiiño. Echa'ã tape rupi jae reta uyemingueta yugüeru quía ra tenondegua ñru reta güi vae. ³⁵Jayave Jesús uguapi, jare ueni jocua doce jemimboe reta. Jayave jei chupe reta:

—Ime yave quía uipota tenondeguarã ico vae, tuñemimichi opaete vae güi, jare tuyeyocui opaete ñru reta pe —jei.

³⁶Jayave ueni penti sambiai, jare oñono jae reta ipite pe. Jayave uicuáva sambiai, jare jei chupe reta:

³⁷—Ime yave quía uyapo icavi vae cua nunga sambiai pe cheree pe vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei.

Oyovaicho'ã yande ndive vae yanembori co
(Mt 10.42; Lc 9.49-50)

³⁸Jayave Juan jei Jesús pe:

—Oporomboe vae, nduecha penti cuimbae nderee pe umbisiri aña reta oya jese vae reta güi, jare ndoe chupe agüiye ma uyapo vaerã. Echa'ã jae ñaneíru'ã co —jei.

³⁹—Agüiye pere chupe jucuarãi —jei Jesús chupe—. Echa'ã cheree pe miacañi uyapo vae ndarau jupivoiño jei icavi mbae vae checoti —jei—.

⁴⁰Echa'ã oyovaicho'ã yande ndive vae yanembori co —jei—. ⁴¹Aramoi quía umeeta peve penti vaso i cheree pe vae. Jucuarãi uyapo yave cheré perovia ramo, añete che jae peve, ambijecoviata co chupe —jei—.

Mbaeyoa uyapoca vae
(Mt 18.6-9; Lc 17.1-2)

⁴²Ime cheré güirovia vae reta. Ime yave quía penti cua nunga pe mbaeyoa uyapoca vae, icavita tẽi co ūru vae reta uñapiti vaerã iyayu re penti ita tuicha vae umbaeso pipe vae, jare omombo vaerã i guasu pe —jei chupe reta—. ⁴³Ndepo jovaicho uyapoca yave mbaeyoa ndeve, iyasia ndiyugüi. Icavi co tecove opa mbae vae nenoí vaerã ndepo jovaicho mbae reve, tata guasu opa mbae vae pe mocui ndepo reve ndeo vaerã tẽi güi —jei—. ⁴⁴Echa'ã tata guasu pe taso ndarau umano, jare tata ndarau ove —jei—. ⁴⁵Jae ramiño vi ndepi jovaicho uyapoca yave mbaeyoa ndeve, iyasia ndiyugüi. Icavi co tecove opa mbae vae nenoí vaerã ndepi jovaicho mbae reve, tata guasu opa mbae vae pe mocui ndepi reve Tumpa nemondo vaerã tẽi güi —jei—. ⁴⁶Tata guasu pe taso ndarau umano, jare tata ndarau ove —jei—. ⁴⁷Jae ramiño vi nderesa jovaicho uyapoca yave mbaeyoa ndeve, eequi ndiyugüi. Icavi co ndico vaerã Tumpa iporoyocuia pe nderesa jovaicho mbae reve, tata guasu pe mocui nderesa reve Tumpa nemondo vaerã tẽi güi —jei—. ⁴⁸Tata guasu pe taso ndarau umano, jare tata ndarau ove —jei— ye chupe reta—. ⁴⁹Echa'ã tata uñeñonocata opaete re, yuquí uñeñonoca tembíu pe rami. Yuquí uñeñonocata vi opaete maemimba Tumpa pe uyeyuca vae re —jei—. ⁵⁰Yuquí icavi co yau vaerã. Êrei jembochi'ã ma yave, ¿quiräita ra jembochi ye? —jei—. Piyapo yuquí uyapo rami, jare pico cavi pâve —jei chupe reta.

Umenda vae uyemombo vae reta
(Mt 19.1-10; Lc 16.18)

10 ¹Jayave Jesús oo joco güi Judea pe Jordán jovaicho pe. Joco pe jeta uyembati ye jae oí vae pe. Jayave Jesús omboe reta, jecooí mai uyapo rami.

²Jayave fariseo reta yugüeru Jesús oī vae pe. Jae reta uipota tēi uyavica chupe. Jáeramo upirandu reta chupe:

—¿Jupi pa cuimbae omombo vaerā jembireco?

³—¿Mbae pa peocui Moisés? —jei Jesús chupe reta.

⁴—Moisés umaeño cuimbae re uicuatía vaerā tupapire jembireco omombo vaerā —jei reta chupe.

⁵—Moisés uicuatía cua mboroyocui pepiatanta ramo —jei Jesús—. ⁶Ērei Tumpa uyapo ramo yave, uyapo cuimbae jare cuña —jei—. ⁷Jáeramo cuimbae usirita tu jare ichi güi, jare oota ico vaerā jembireco ndive —jei—. ⁸Jare mocui vae uyeyapota penti ramiño. Jáeramo mbaeti ma mocui rami. Yugüüreco penti ramiño —jei—. ⁹Jáeramo agüiye quía tumbisiri Tumpa umiíru vae reta —jei chupe reta.

¹⁰Jare o pe ñugüüinói yave, jemimboe reta upirandu ye Jesús pe cua re.

¹¹Jayave Jesús jei chupe reta:

—Cuimbae omombo jembireco jare umenda īru cuña ndive yave, uyuvanga menda re jembireco omombo vae coti. ¹²Jare cuña usiri ime güi jare umenda īru cuimbae ndive yave, uyuvanga vi menda re —jei.

Jesús uyerure Tumpa pe sambiai reta re

(Mt 19.13-15; Lc 18.15-17)

¹³Jare amocue vae güeru Jesús oī vae pe sambiai reta, Jesús oñono vaerā ipo jese reta. Ērei jemimboe reta uñeengata güeru vae reta pe.

¹⁴Jesús cua uecha yave, pochi jemimboe reta pe, jare jei chupe reta:

—Pemaeño sambiai reta re yugüeru vaerā checoti. Agüiye piyopia. Echa'ā cua nunga uyeyocui Tumpa pe iporoyocua pe —jei—. ¹⁵Añete che jae peve, pipota'ā yave Tumpa pe piyeyocui vaerā penti sambiai uipota rami, ndarau pico Tumpa iporoyocua pe —jei.

¹⁶Jayave Jesús uicuāva sambiai reta, jare oñono ipo jese reta, jare uyerure Tumpa pe jese reta.

Cuimbae icocatu vae

(Mt 19.16-30; Lc 18.18-30)

¹⁷Jare Jesús joco güi oo yave, penti cuimbae osi ou icoti. Uyeatíca Jesús jovai.

—Oporamboe vae, nde ndepiacavi co —jei Jesús pe—. ¿Mbae pa ayapota anoi vaerā tecove opa mbae vae? —jei.

¹⁸—¿Maera pa ndere cheve chepiacavi vae co? —jei Jesús chupe—. Mbaeti quía ipiacavi, jaefio co Tumpa —jei—. ¹⁹Nde ndicuaa co mboroyocui reta: ‘Agüiye iyuvanga menda re. Agüiye epuruyuca. Agüiye nemonda. Agüiye ndapu īru vae re. Agüiye epurumbitaví. Ipiu nderu jare ndesi’ —jei chupe.

²⁰—Oporamboe vae, ayaví'ā penti ave cua mboroyocui reta chemichi güive —jei cuimbae chupe.

²¹Jesús umae jese uau reve.

—Ime mbae uata ndiyapo vaerā —jei chupe—. Ecua emee opaete mbaembae nenoí vae corepoti re, jare emee ndecorepoti iparavete vae reta pe, jare ndicocatuta ara pe. Jayave evoí ndecurusu, jare eyu cherupié —jei.

²²Érei cua uyandu yave, cuimbae oo ipiatití reve. Echa'ā jeta mbaembae güinoi.

²³Jayave Jesús umae iyipi rupi, jare jei jemimboe reta pe:

—Yavai ete co icocatu vae reta uique vaerā Tumpa iporoyocuia pe.

²⁴Jemimboe reta ipiacañi Jesús jei vae re. Érei Jesús jei ye:

—Cherivi reta, yavai ete co icocatu vae reta uique vaerā Tumpa iporoyocuia pe. Echa'ā jei tēi ipia pe: ‘Icavita co cheve. Echa'ā jeta mbaembae anoi’ —jei, jei Jesús—. ²⁵Yavai ete icocatu vae uique vaerā Tumpa iporoyocuia pe, maemimba camello jee vae yuu jesacua rupi uasa vaerā güi —jei.

²⁶Jayave jae reta ipiacañi ete, jare upirandu uyupe:

—Jucuarai yave, ¿quía pa ipuere uyembiasaca?

²⁷Jesús umae jese reta jare jei:

—Ívi pegua reta ipuere'ā uyembiasa. Érei Tumpa ipuere umbiasa reta. Echa'ā Tumpa ipuere uyapo opaete mbaembae —jei chupe reta.

²⁸Jayave Pedro jei Jesús pe:

—Mase, ore opaete mbaembae ndueya, ndoyu vaerā nderupié.

²⁹—Añete che jae peve —jei Jesús—, ime yave quía ueya jenta, ani tiuei reta, ani tivi reta, ani jindi reta, ani tu, ani ichi, ani jembireco, ani isambiai reta, ani iivi reta chereco pegua jare Tumpa iñee icavi vae jeco pegua vae, ³⁰cien rupi jecoviata co chupe ívi pe ico rambueve. Jecoviata jenta reta, tiuei reta, tivi reta, jindi reta, ichi reta, isambiai reta jare iivi reta —jei—. Érei íru vae reta uyapota icavi mbae vae chupe. Érei taicue rupi Tumpa umeeta chupe tecove opa mbae vae —jei—. ³¹Érei Tumpa umbitaicueta uyembutuicha vae reta, jare umitenondeta uñemimichi vae reta —jei chupe reta.

Jesús umimbeu ye umanota co

(Mt 20.17-19; Lc 18.31-34)

³²Jesús jare jae ndive ñugüinoi vae reta yugüiraa tape Jerusalén cotí oo vae rupi, jare Jesús tenonde oo. Jare jaicue rupi yugüiraa vae reta ipiacañi jare uquiye. Jayave Jesús ueni ye jocua doce jemimboe reta íru reta ipite güi, jare umbipi umimbeu chupe reta mbae uyeyapota oī chupe vae.

³³—Mase, yaa co ñaī Jerusalén pe —jei chupe reta—. Jare che cuimbaerā ayeyapo vae penti vae chemeeta sacerdote reta itenondegua reta jare mboroyocui re oporomboe vae reta pe. Jae reta jeita amano vaerā, jare chemeeta judío mbae vae reta pe —jei—. ³⁴Jae reta cheyoyaita, chenupata chicote pe, undivita cheré, jare cheyucata. Érei mbapi ara rupi aicove yeta ayu umanocue vae reta ipite güi —jei chupe reta.

**Jacobo jare Juan uyerure vae
(Mt 20.20-28)**

35 Cua jaicue rupi Zebedeo tai reta Jacobo jare Juan jee vae yugüeru Jesús coti jare jei chupe:

—Oporomboe vae, nduijota ndiyapo vaerā oreve nduyerureta ndeve jese vae.

36 —¿Mbae pa pipota ayapo vaerā peve? —jei Jesús chupe reta.

37 —Ndiyembutuichaca yave, emaeño oreré nduguapi vaerā ndeyipi pe, penti ndeacata coti jare ūru ndeaso coti —jei reta chupe.

38 —Picuaa'ā mbae re piyerure vae —jei Jesús—. ¿Pepuereta pa piporara che aiporarata vae rami? ¿Pepuereta pa piyembibautizaca che ayembibautizacata vae rami? —jei.

39 —Orepuereta co —jei reta.

—Añete pe reta piporarata che aiporarata vae rami, jare pe reta piyembibautizacata che ayembibautizacata vae rami —jei Jesús—. 40 Êrei chepuere'ā jae peve peguapi vaerā cheyipi pe, penti cheacata coti jare ūru cheaso coti. Echa'lā Tumpa umicuatiro ma joco pe uguapita vae reta peguarā —jei chupe reta.

41 Jare ūru diez Jesús jemimboe reta cua uyandu yave, pochi reta Jacobo jare Juan pe. 42 Jayave Jesús ueni reta.

—Picuaa cavi co cua —jei chupe reta—. Mburuvicha ivi pegua reta oporoyocui, jare mbaepuere güinoi vae reta jei ūru reta pe mbae uyapo vaerā —jei—. 43 Êrei pe reta agüiye piyapo jucuarāi —jei—. Ime yave penti pepite pe oī vae uipota mbaepuere güinoi vae, tuyeyocui ūru reta pe. 44 Jare ime yave penti pepite pe oī vae uipota tenondeguarā ico vae, tuyeyocui ūru reta pe —jei—. 45 Echa'lā che cuimbaerā ayeyapo vae ayu ayeyocui vaerā ūru vae reta pe. Ayu'lā ūru vae reta uyeyocui cheve vaerā. Ayu amano vaerā, jeta vae aepi vaerā —jei chupe reta.

**Bartimeo jesa mbae vae ucuera
(Mt 20.29-34; Lc 18.35-43)**

46 Jayave yugüiraa uvāe tenta guasu Jericó pe. Jare Jesús oo ye Jericó güi jemimboe reta jare jeta vae reta ndive. Jare Timeo tai Bartimeo jee vae uguapi uyerure oī mbae re tape jembei pe. Bartimeo co jae jesa mbae vae. 47 Jare uicuua Jesú Nazaret pegua uasa oo oī yave, iñeeāta reve jei:

—Cheparareco, Jesús. Nde co jae David iñemoñaa reta pegua —jei.

48 Jeta joco pe ñugüinoi vae reta uñengata chupe. Uipota tēi umiquíi. Êrei jae jeiete iñeeāta reve jei:

—David iñemoñaa reta pegua, cheparareco.

49 Jayave Jesús uyemboi.

—Peeni —jei.

Jayave ueni reta jesa mbae vae.

—Iñemiatangātu. Epūa. Nereni ma oī —jei reta chupe.

50 Jayave jesa mbae vae ueya iyasoya, jare upūa voi oo Jesús coti.

51 Jesús upirandu chupe:

—¿Mbae pa ndipota ayapo vaerā ndeve?

—Tamae, oporomboe vae —jei jesa mbae vae.

52 Jayave Jesús jei chupe:

—Ndepuere ndeo. Ndecuera ma, nderovia cheré ramo —jei.

Jupivoiño ipuere umae, jare oo Jesús jaicue tape rupi.

Jesús uique Jerusalén pe

(Mt 21.1-11; Lc 19.28-40; Jn 12.12-19)

11 **1** Jare coiño ma Jerusalén güi ñugüinói yave, yugüiraa uvāe tenta guasu-raí reta Betfagé jare Betania iyipi pe, ivitu guasu Olivos jovai. Jayave Jesús oyocui mocui jemimboe reta:

—Pecua pea tenta guasu-raí yanderovai oī vae pe —jei chupe reta—. Peo pevāe rupive, pevāeta penti mburica tairusu vae uñeñapíti oī. Ndei ave etei quía opo jese. Piyora jare peru —jei—. **3** Jare ime yave quía jei peve vae: ‘¿Maera pa cua piyapo?’ pere chupe: ‘YandeYa uipota uiporu, ērei imambae güeruruca yeta cua pe’ —pere, jei chupe reta.

4 Jayave Jesús jemimboe reta yugüiraa, jare uvāe mburica tairusu vae. Uñeñapíti oī tape pe penti onque jovai. Jayave jae reta oyora. **5** Jare amocue joco pe ñugüinói vae jei Jesús jemimboe reta pe:

—¿Maera pa piyora peí mburica?

6 Jesús jemimboe reta jei chupe reta Jesús oyocui reta vae. Jayave joco pe ñugüinói vae reta umaeño güiraa vaerā. **7** Jayave güeru mburica tairusu vae Jesús oī vae pe. Jayave Jesús jemimboe reta oñono iyasoya mburica icupe re, jare Jesús opo jese. **8** Jare jeta vae uipiso iyasoya tape rupi mburica jenonde, jare íru vae reta uyasia ñanaroqui jare oñono tape rupi. **9** Jare Jesús jenonde yugüiraa vae reta jare jaicue rupi yugüiraa vae reta iñeeäta reve jei:

—¡Cavi co! Tuyembiadoraca yandeYa jee re ou vae. **10** Oporoyocuita yandetenondegua David jee vae oporoyocui rami. Tuyembiadoraca. Tei reta ‘icavi co’ ara pe —jei reta.

11 Jare Jesús oo uvāe Jerusalén pe, jare uique Tumpa jo pe. Joco pe umae opaete mbaembae re. Jare caaru ma yave, ou ye Betania pe jocua doce jemimboe reta ndive.

Iva ía mbae vae

(Mt 21.18-19)

12 Piareve pe yugüiraa ye Betania güi, jare Jesús iyembai. **13** Jare mbiri güi uecha penti iva joqui reve, jare oo umae jese ime ra ía. Ērei uecha ia'ā, jaeño joqui. Echa'ā ndei uvāe iva ía vaerā. **14** Jayave Jesús jei iva pe:

—Ndaraú etei ma ndeía.

Jare jemimboe reta uyandu.

Jesús Tumpa jo pe uyapo vae
(Mt 21.12-17; Lc 19.45-48; Jn 2.13-22)

¹⁵ Jare yugüiraa uvāe Jerusalén pe. Jayave Jesús uique Tumpa jo pe, jare umbipi omoē joco güi umaemee vae reta jare mbae ogua vae reta, jare umbiyapara corepoti uiipepica vae reta imesa reta jare picasu reta umee vae reta jenda reta. ¹⁶ Jare umaeño'ā quía re jívita reve uguata vaerā Tumpa jo rupi. ¹⁷ Jare jei joco pe ñugüinói vae reta pe:

—Tumpa iñee pe uyecuatía oí cuarāi: ‘Chero uyembijeeta o opaete ivi pegua reta ipuere uyerure Tumpa pe pipe vaerā.’ Jucuarāi uyecuatía oí. —Erei pe reta piyapo ma imonda vae reta iñemia rami —jei chupe reta.

¹⁸ Jayave sacerdote reta itenondegua reta jare mboroyocui re oporomboe vae reta cua uyandu yave, ueca quirāi ipuere uyuacaca vaerā Jesús. Echa'ā jae reta uquiyé chugüi, opaete vae ipiacañi iporomboe re ramo. ¹⁹ Jare pítuipi yave, Jesús ou ye Jerusalén güi.

Iva yípi ma
(Mt 21.20-22)

²⁰ Piareve pe neimbove yave uasa yugüiraa ye yave, uecha iva yípi ma iyípi güive. ²¹ Jayave Pedro imandúa jese, jare jei Jesús pe:

—¡Emae, oporomboe vae! Iva pe ndere iata'ā ma vae yípi ma —jei.

²² Jesús jei jemimboe reta pe:

—Perovia Tumpa. ²³ Añete che jae peve, yae yave cua ivitu guasu pe: ‘Ecua iyemombo i guasu pe’, jare yae'ā yave yandepia pe: ‘Ndaraū ndipo uyeyapo’, ērei yarovia yave yae vae uyeyapota, uyeyapota co yandeve —jei chupe reta—. ²⁴ Jáeramo che jae peve, ime yave mbae pipota vae, piyerure Tumpa pe jese. Jare perovia yave Tumpa umeeta co peve, penoita co —jei—. ²⁵ Jare piyerure peī Tumpa pe yave, pembiasa īru icavi mbae vae uyapo pecoti vae pe, peRu ara pe oí vae umbiasa vaerā vi peve pembaeyoa reta. ²⁶ ērei pembiasa'ā yave īru icavi mbae vae uyapo pecoti vae pe, peRu ara pe oí vae ndaraū vi umbiasa peve pembaeyoa reta —jei.

Jesús imbaepuere
(Mt 21.23-27; Lc 20.1-8)

²⁷ Jare yugüiraa uvāe ye Jerusalén pe. Jare Jesús uguata rambueve Tumpa jo rupi, yugüeru jae oí vae pe sacerdote reta itenondegua reta, mboroyocui re oporomboe vae reta, jare tenta guasu pegua reta itenondegua reta. ²⁸ Jae reta upirandu chupe:

—¿Mbae nunga mbaepuere pa nenoí cua mbaembae ndiyapo vaerā? ¿Quía pa umee ndeve mbaepuere cua ndiyapo vaerā? —jei reta.

²⁹ Jayave Jesús jei chupe reta:

—Che vi tapirandu peve mbae re. Pemimbeu yave cheve, che vi amimbeuta peve mbae nunga mbaepuere anoi cua mbaembae ayapo vaeră —jei—.³⁰ ¿Quía pa ombou Juan upurumbibautiza vaeră? ¿Tumpa pa ombou? ani ¿iví pegua reta pa ombou? Pemimbeu cheve —jei chupe reta.

³¹ Jayave jae reta jei uyupe:

—Yae yave: ‘Tumpa co ombou’, jae jeita yandeve: ‘Jucuarăi yave, ¿maera pa perovia?’³² Ani ¿yaeta pa: ‘Iví pegua reta co ombou?’ —jei reta.

Ñrei jae reta uquiyé tenta guasu pegua reta güi. Echa'ã opaete vae güirovia Juan co jae añetete penti Tumpa iñee umimbeu vae.³³ Jáeramo jei reta Jesús pe: —Nduicua'ã.

—Che vi ndarau amimbeu peve mbae nunga mbaepuere anoi cua mbaembae ayapo vaeră —jei Jesús chupe reta.

Co iporúa icavi mbae vae reta

(Mt 21.33-46; Lc 20.9-19)

12

¹Jayave Jesús umbipi imiari chupe reta umijaanga reve.

—Ico penti cuimbae icoră uiquëse vae, jare oñotí pipe jeta uva —jei—. Jayave oyoo ivi, jare uyapo uva uitami pipe vaeră. Uyapo vi penti chapapa, umae vaeră ivate güi opaete co re. Jayave uiporuca ico ūru vae reta pe, jae reta uyandareco vaeră jese. Jayave co iya oo mbiri ambie ivi pe —jei—.²Jare uva yagüiye ma yave, co iya ombou penti jembiocui co iporúa reta pe, jae reta umbiyao vaeră tēi uva chupe reta, iya güinoi vaeră imbaeră.³ Ñrei jae reta uipisi uinupa co iya jembiocui, jare omondo ye. Umee'ã etei chupe güiraa vaeră —jei—.⁴Jayave co iya ombou ye tēi ūru jembiocui. Ñrei co iporúa reta uyapi ita pe umbipere iñaca rupi, jare uyapo reta icavi mbae vae chupe. Jayave omondo ye —jei—.⁵Jayave co iya ombou ye tēi ūru jembiocui. Ñrei co iporúa reta uyuca cua. Jare jucuarăiñoi uyapo reta jeta ūru co iya jembiocui reta pe. Jae reta uinupa amocue vae, jare uyuca ūru vae reta —jei Jesús—.⁶Co iya güinoi jaeño penti tai uau ete vae. Taicue ete ombou cua tai co iporúa reta pe. Co iya jei tēi: ‘Aramoi jae reta uiputa cheraí’ —jei, jei chupe reta—.⁷ Ñrei co iporúa reta jei uyupe: ‘Cua co jae iyará vae. Yayuca, jare yande yaicota co iyará’ —jei reta, jei—.⁸Jayave jae reta uipisi co iya tai uyuca omombo co güi —jei—.⁹ ¿Mbae ra uyapota co iya? —jei—. Outa, opa uyuca vaeră jocua co iporúa reta, jare uiporucata ico ambie vae reta pe —jei Jesús—.¹⁰ ¿Peminguetalá pa cua Tumpa iñee pe uyecuatía oí vae?

‘Ita tenta iyapoa reta omombo vae uyeyapo ma ita tenondegua vae.

¹¹ YandeYa uyapo cua.

Yaecha ma, jare yandepiacañi jese.’

Jucuarăi uyecuatía oí —jei chupe reta.

¹² Jayave jocua uyapisaca jese vae reta uipota tēi uipisi Jesús. Echa'ã uicuaa catu cua umijaanga reve jei vae uicuaaca quirái jae reta teco güinoi. Ñrei uquiyé tenta guasu pegua reta güi. Jáeramo ueyaño, jare yugüiraa.

¿Jupi pa yambiepi vaerā César pe?
(Mt 22.15-22; Lc 20.20-26)

¹³Jayave jae reta ombou amocue fariseo reta jare herodiano reta, uyavica vaerā tēi chupe jae uyemingueta yave. ¹⁴Jae reta yugüeru uvāe yave, jei Jesús pe:

—Oporomboe vae, nduicuua nde ndere vae añete co. Nde nemaе oyovaque opaete pāve re. Nembutuicha'ā penti ave īru vae güi. Nde ndeporomboe cavi quirāi Tumpa uipota yaico vaerā vae re —jei reta—. César yandecuи yambiepi vaerā chupe corepoti pe. ¿Jupi pa yambiepi vaerā chupe? ani ¿jupi'ā pa? ¿Yambiepita pa chupe? ani ¿yambiepita'ā pa chupe? —jei reta Jesús pe.

¹⁵Ērei Jesús uicuua jae reta uipota tēi co umbitavi, jare jei chupe reta:
 —¿Maera pa pipota piyavica cheve? Peru cheve penti corepoti taecha —jei.

¹⁶Jae reta güeru chupe. Jayave jae upirandu chupe reta:
 —¿Quía jova īā pa cua? ¿Quía jee pa cua uyecuatía oī vae? —jei.
 —Cua César imbae co —jei reta.
¹⁷—Pemee César pe César pegua, jare pemee Tumpa pe Tumpa pegua —jei Jesús chupe reta.

Jare jae reta ipiacañi jese.

Ícove yeta pa umanocue vae reta?
(Mt 22.23-33; Lc 20.27-40)

¹⁸Jayave yugüeru vi Jesús oī vae pe amocue saduceo reta. Opaete saduceo reta jei umanocue vae reta icove ye'ā co. Saduceo yugüeru vae reta jei Jesús pe:

¹⁹—Oporomboe vae, Moisés uicuatía ueya yandeve cuarāi: ‘Penti tiquei vae umano yave, jembirecocue mbaeti imembī chupe yave, cuimbae amiri tīvī tumenda jocua cuña ndive. Jayave cuña imembī yave, cuimbae tumbijee sambiai tiquei amiri jee pe.’ Jucuarāi uicuatía Moisés —jei reta chupe—. ²⁰Ico penti cuimbae seis tīvī reta güinoi vae. Cua cuimbae umenda, jare umano umimembī mbae reve —jei reta—. ²¹Cuimbae amiri jaicue rupigua umenda jembirecocue ndive, ērei umano vi umimembī mbae reve. Jae ramiño vi uyeyapo jaicue rupigua ye pe. ²²Opaete siete reve umenda jocua cuña ndive, jare opaete siete reve umano umimembī mbae reve. Taicue rupi cuña umano vi —jei reta—. ²³Jayave umanocue vae reta icove ye yave, ¿quía nunga vae jembirecorā pa icota jocua cuña? Echa'ā opaete siete reve umenda jae ndive —jei reta.

²⁴—Pe reta piyaví co —jei Jesús chupe reta—. Echa'ā picuaalā Tumpa iñee uyecuatía oī vae jare Tumpa imbaepuere —jei—. ²⁵Echa'ā umanocue vae reta icove ye yave, cuimbae reta jare cuña reta ndarau umenda. Yugüirecota

ángel ara pe ñugüinoi vae reta yugüireco rami —jei—. ²⁶Tamimbeu peve umanocue vae reta regua. Icove yeta co. ¿Pemingueta'ã pa Moisés uicuatía vae? —jei—. Uyecuatía oĩ jocua yai regua, jare quirái Tumpa jei Moisés pe jocua yai jendí vae ipite güi: ‘Che co Abraham, Isaac jare Jacob iTumpa’ —jei, jei chupe reta—. ²⁷Tumpa mbaeti co umanocue vae reta iTumpa. Jae co tecove güinoi vae reta iTumpa. Tuicha co piyavi —jei.

Mboroyocui tenondegua vae
(Mt 22.34-40)

²⁸Ou vi Jesús oĩ vae pe penti mboroyocui re oporomboe vae. Uyandu uyeaca reta, jare uicuaa Jesús umimbeu cavi co chupe reta. Jayave jae upirandu Jesús pe: —¿Mbae nunga mboroyocui pa co jae tenondegua vae? —jei.

²⁹Jesús jei chupe:

—Mboroyocui tenondegua vae co cua: ‘Israel pegua, iyapisaca. YandeYa Tumpa, jaéño co Tumpa. ³⁰Eau ndeYa Tumpa opaete ndepia reve, opaete nderecove reve, opaete ndepiayeminguela reve jare opaete nepiráta reve.’ Cua co jae mboroyocui tenondegua vae —jei chupe—. ³¹Jare jaicue rupigua co cua: ‘Eau nderapicha nde ndiyerau rami.’ Mbaeti íru mboroyocui tenondegua cua reta güi vae —jei.

³²Jayave mboroyocui re oporomboe vae jei Jesús pe:

—Añete co, oporomboe vae. Icavi ndere Tumpa pentiño co jare mbaeti ye íru. ³³Jare yaau yave Tumpa opaete yandepia reve, opaete yanderecove reve, opaete yandepiayeminguela reve jare opaete ñanepiráta reve, jare yaau yave yanderapicha yande yayerau rami, jocua icavi opaete maemimba Tumpa peguarã ñamee vae reta güi —jei.

³⁴Jare Jesús uyandu yave jae jei jipi cavi vae, jei chupe:

—Jeta'ã uata ndiyeyocui vaerã Tumpa pe iporoyocua pe.
Jare mbaeti ma quía uipota upirandu chupe mbae re.

¿Quía iñemoña reta pegua pa co Cristo?
(Mt 22.41-46; Lc 20.41-44)

³⁵Jare Jesús oporomboe oĩ Tumpa jo pe.

—¿Maera pa jei mboroyocui re oporomboe vae reta Cristo co jae David iñemoña reta pegua? —jei—. ³⁶Echa'ã David etei jei Espíritu Santo rupi cuarãi:

‘YandeYa jei cheYa pe:

Eguapi cheyípi pe cheacata cotí,
nderovaicho reta opa amiamiri regua.’

Jucuarãi jei David aracae —jei Jesús—. ³⁷¿Quirái pa ipuere ico David iñemoña reta peguarã? Echa'ã David etei jei chupe: ‘CheYa’ —jei Jesús chupe reta.

Jare jeta vae uyapisaca ñugüinoi Jesús re uyerovia reve.

Jesús umbíjeco mboroyocui re oporomboe vae reta
(Mt 23.1-36; Lc 11.37-54; 20.45-47)

38 Jare Jesús oporomboe yave, jei chupe reta:

—Piñemoa ngatu mboroyocui re oporomboe vae reta güi —jei—. Jae reta jecuaeño uipota uguata jemimonde pucu vae reve, jare jecuaeño uipota īru vae reta pe uyembisaludaca vaerā calle reta rupi —jei—.

39 Yugüiraa yave tupao pe jare parea pe, jecuaeño uipota uguapi tenda tenondegua vae reta pe —jei—. **40** Jare upīro reta cuña ime umano vae reta güi opaete imbaembae, jare pucu uyerure Tumpa pe upurumbitaví vaerā —jei—. Jae reta uiporara eteta co —jei chupe reta.

Cuña ime umano vae umee corepoti Tumpa pe
(Lc 21.1-4)

41 Penti ara Jesús uguapi oī corepoti jiru jovai Tumpa jo pe, jare uecha quirāi jeta yugüieru vae reta oñono corepoti pipe. Icocatu vae reta oñono jeta corepoti.

42 Jare ou vi penti cuña ime umano vae iparavete vae. Jae oñono mocui riare. Jocua jetalā co jepi. **43** Jare Jesús ueni jemimboe reta jare jei chupe reta:

—Añete che jae peve, cua cuña ime umano vae iparavete vae uyapo jeta opaete īru oñono vae reta güi —jei—. **44** Echa'ā opaete īru reta güieru oñono jeta güinoi vae güi. Êrei cua cuña, yepe tēi iparavete, oñono opaete güinoi vae. Jocua co jembúo jepirā tēi vae —jei chupe reta.

Tumpa jo uyeitita
(Mt 24.1-2; Lc 21.5-6)

13 **1** Jesús oē yave Tumpa jo güi, penti jemimboe jei chupe:

—Mase, oporomboe vae, icavi cua ita reta jare o reta.

2 —¿Nemae pa neī cua o tuicha vae reta re? —jei Jesús chupe—. Ndaraupiñita penti ave ita īru ita iárambo. Opaete uyeitita co —jei.

Mbaesusere reta uyeyapota vae
(Mt 24.3-28; Lc 21.7-24; 17.22-24)

3 Jare Jesús uguapi oī rambueve ívitu guasu Olivos re Tumpa jo jovai, Pedro, Jacobo, Juan jare Andrés upirandu chupe, jae retaño jae ndive ñugüinoi yave:

4 —Emimbeu oreve, ¿quirāi yave pa cua uyeyapota? Jare opaete cua uyeyapota ma yave, ¿quirāita pa nduicuua? —jei reta chupe.

5 Jayave Jesús jei chupe reta:

—Piñemoa ngatu agüiye vaerā petavi. **6** Echa'ā yugüeruta jeta cheree pe uyembijeeta vae reta. Jae reta jeita: ‘Che co jae Cristo.’ Jare umbitavita jeta vae reta —jei—. **7** Imeta co ñerāro reta coiño pegüi. Imeta vi ñerāro reta mbiri pegüi. Piyandu yave cua reta regua, agüiye pequije. Cua susere reta uyeyapoñotai co. Êrei cua susere reta ndei ave co opa vaerā —jei Jesús—. **8** Penti ivi pegua

reta uñerārota ambie ivi pegua reta ndive, jare mburuvicha reta uñerārota ūru mburuvicha reta ndive. Jare ivi tanta ucātata jeta que rupi. Jare imeta caruai reta jare tecorai reta. Ērei cua susere reta uyembipi ramo co oī —jei chupe reta—.

⁹Piñemoa ngatu. Echa'ā ūru vae reta pereraata mburuvicha reta ñugüiinoi vae pe, uñeapo vaerā peré. Jare penupata judío reta itupao reta pe. Jare pereraata mburuvicha guasu reta jovai chereco pegua, chemimbeu vaerā chupe reta —jei—. ¹⁰Jare Tumpa iñee icavi vae jerācuata co rani opaete ivi pegua reta pe —jei—. ¹¹Jare ūru vae reta pereraa yave pemee vaerā mburuvicha reta pe, agüiye piyemipia'ā mbae pereta vae re —jei—. Pemee yave, Tumpa uicuaacata peve mbae pere vaerā. Jocuaño pere. Echa'ā Espíritu Santo pemberita piyeminguela vaerā, pe retaiñol'ā co piyemingueta —jei—. ¹²Tiquei umeeta tivi, uycaca vaerā. Jare tu umeeta isambiai. Jare sambiai reta oyovaichota tu jare ichi ndive, jare uycacata reta. ¹³Jare piñemitarēicata opaete vae pe chereco pegua. Ērei jósata oo uvāe iyapi pe vae uyembiasacata co —jei chupe reta—.

¹⁴Jare peechara icavi mbae vae opaete urucumegua vae uyemboi oī oīta'ā tēi vae pe. Tumpa iñee aracae umimbeu vae Daniel jei uycuaata co. (Umingueta vae tuicuaa) —jei—. Jayave Judea pe ñugüiinoi vae reta tosi ivitu guasu coti —jei—. ¹⁵Jare o cupe re oī vae ugüeyi yave, agüiye tuique jo pe güiraa vaerā imbaembae. ¹⁶Jare ico pe oī vae agüiye tou ye jenta pe güiraa vaerā iyasoya —jei—. ¹⁷Jare ipurúa vae reta jare umicambu vae reta uiporarata jocua ara reta pe —jei— Jesús chupe reta—. ¹⁸Piyerure Tumpa pe cuarāi: ‘Agüiye emaeño tuyeyapo roi ma yave.’ ¹⁹Echa'ā jocua ara reta pe ivi pegua reta uiporara eteta. Jucuarāi'ā uiporara reta Tumpa ivi uyapo güive, jare ndarau ye jucuarāi uiporara reta —jei—. ²⁰Jare yandeYa uipotal'ā yave opa vaerā jocua ara reta, mbaetita tēi quía ipuere ico. Ērei Tumpa uiparavo vae reta jeco pegua opata jocua ara reta —jei chupe reta—. ²¹Aramoi jocua ara reta pe quía jeita peve: ‘Mase, co oī Cristo’, ani jeita: ‘Mase, pee oī Cristo.’ Jucuarāi jei yave, agüiye perovia —jei—. ²²Amocue upurumbitaví vae reta jeita: ‘Che co jae Cristo’, jare ūru upurumbitaví vae reta jeita: ‘Che co jae penti Tumpa iñee umimbeu vae.’ Jare jae reta uyapota miacañi reta, umbitaví vaerā tēi Tumpa uiparavo vae reta —jei—. ²³Piñemoa ngatu. Amimbeu ma peve opaete, ndei uyeyapo mbove —jei chupe reta—.

Cuimbaerā uyeyapo vae ou yetá (Mt 24.29-44; Lc 21.25-36)

²⁴Jayave opa uiporara reta jocua ara reta pe yave, guarasi uñemipítumimbita, jare yasi ndarau ma jembipe. ²⁵Yasitata reta oata ara güi, jare opaete ara re mbaepuere güinoi vae reta ucātata —jei—. ²⁶Jayave ivi pegua reta cherechata ayu amapítu reve. Che cuimbaerā ayeyapo vae anoitá mbaepuere tuicha vae, jare ayembidoracata opaete vae pe —jei—. ²⁷Jayave amondota ángel reta güeru vaerā aiparavo vae reta opaete ivi rupi güi —jei—.

²⁸Yandepuere yamijaanga iva. Piyemboe jese —jei—. Joqui yave, picuua uyaro ma co ama oquí vaerā —jei Jesús—. ²⁹Jae ramiño vi pe

reta peeche yave cua mbaembae uyeyapo ñugüïnoi vae, picuaata che coïño ma co aï —jei—. ³⁰Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei chupe reta—. ³¹Ara jare ivi opata, ērei chiñee ndarau opa —jei—.

³²Ērei mbaeti quía uicuña mbae ara pe ani mbae ora pe yepe cua uyeyapota, jaeño cheRu. Ángel ara pe ñugüïnoi vae reta uicuña'ā. Che co jae Tumpa Tai. Ērei che ave aicuña'ā —jei—. ³³Jecuñaño peäro, jare piyerure Tumpa pe. Echa'lā picuña'ā quirai yave ra uyeyapota —jei—. ³⁴Yamijaanga penti cuimbae oo ambie ivi pe vae. Oota ma jenta güi yave, umee mbaepuere jembiocui reta pe, jare oyocui penti penti uyapo vaerä iparavíqui, jare oyocui vi taraquéra jároa uáro cavi vaerä —jei—. ³⁵Picuña'ā quirai yave ra tenta iya ou yeta uväe. Aramoi outa uväe pítu ave ma yave, ani piare catu yave, ani uru cuimbae uñee yave, ani neimbove yave —jei—. Jáeramo peäro pei, ³⁶agüiye vaerä, aramoiño ou uväe yave, pepocou peque pei —jei—. ³⁷Jare cua jae peve vae jae vi opaete vae pe: Peäro pei —jei chupe reta.

Jovaicho reta uyemingueta uyucaca vaerä Jesús
(Mt 26.1-5; Lc 22.1-2; Jn 11.45-53)

14

¹Mocui araño ma uata pascua uyapo reta vaerä. Jocua ara pe judío reta jou mbiyape ovu mbae vae. Jare sacerdote reta itenondegua reta jare mboroyocui re oporomboe vae reta ueca ñugüïnoi quirai ipuere uiplisi tavi rupi Jesús, uyucaca vaerä. ²Ērei jei reta:

—Agüiye yaipisi pascua ara rupi, agüiye vaerä tenta guasu pegua reta uyapo tecorai.

Cuña upiyere mbae ipiche cavi vae Jesús re
(Mt 26.6-13; Jn 12.1-8)

³Jare Jesús ucaru oï rambueve Betania pe Simón ipire ocuise vae jenta pe, uique penti cuña. Jae güeru iru-rai ita alabastro jee vae pegua. Cua iru-rai tinee mbae ipiche cavi vae nardo jee vae pe. Cua nardo jepi ete. Cuña oyoca iru-rai, jare upiyere nardo Jesús iñaca re. ⁴Jayave amocue joco pe ñugüïnoi vae pochi jare jei uyupe:

—¿Maera pa umicañitei? ⁵Umee yave corepoti re, güinoita tēi trescientos ara mbaravíqui jepi pegua umee vaerä iparavete vae reta pe —jei reta.

Jayave iñera reta jese.

⁶Ērei Jesús jei chupe reta:

—Pemaeño jese. ¿Maera pa pemambeco? Icavi vae co uyapo cheve —jei—.

⁷Echa'lā yugüirecoñotai co iparavete vae reta pe reta ndive, jare pipota yave, pepuereta pembori. Ērei che ndarau aicoño pe reta ndive —jei—. ⁸Cua cuña uyapo ipuere vae. Chembipiche cavi ma, ndei añañotica mbove —jei—.

⁹Añete che jae peve, opaete ivi rupi Tumpa iñee icavi vae jerácuata vae rupi, cua uyapo vae vi jerácuata, iru vae reta imandúa vaerä jese —jei chupe reta.

Judas umeeta Jesús*(Mt 26.14-16; Lc 22.3-6)*

10 Jayave jocua doce jemimboe reta güi penti Judas Iscariote jee vae oo sacerdote reta itenondegua reta ñugüïinoi vae pe, umee vaerã Jesús chupe reta. **11** Cua uicuua reta yave, uyerovia reta, jare jei Judas pe umeeta co chupe corepoti. Jayave Judas umbipi ueca quirãi ipuere umee vaerã Jesús chupe reta.

Jesús ucaru jemimboe reta ndive*(Mt 26.17-29; Lc 22.7-23; Jn 13.21-30; 1 Cor 11.23-26)*

12 Pascua ara pe judío reta uyuca ovecha. Jocua ara umbipi jou mbiyape ovu mbae vae. Jayave Jesús jemimboe reta jei chupe:

—¿Quiape pa ndipota nduyapicatu vaerã, tembíu pascua pegua ndeu vaerã?

13 Jayave Jesús oyocui mocui jemimboe reta:

—Pecua tenta guasu pe —jei chupe reta—. Peoväitita joco pe penti cuimbae i güüraa iru pe vae. Pecua jaicue —jei—. **14** Jare uique yave tenta pe, pere tenta iya pe: ‘Oporomboe vae jei: ¿Quiape pa ime oï o, joco pe jau vaerã tembíu pascua pegua cheremimboe reta ndive’ —jei, pere chupe, jei Jesús—. **15** Jayave tenta iya uechacata peve penti o tuicha vae jo ivate pe, opaete mbaembae yaiporuta vae reve. Joco pe piyapicatu yandeve —jei chupe reta.

16 Jare Jesús jemimboe reta yugüüraa uväe yave tenta guasu pe, uväe opaete Jesús jei chupe reta vae rami. Jare uyapo reta tembíu pascua pegua jou reta vaerã.

17 Jare pítu ma yave, Jesús oo jocua doce jemimboe reta ndive. **18** Jare mesa pe uguapi ucaru ñugüïinoi rambueve, Jesús jei chupe reta:

—Añete che jae peve, penti pepite pe oï vae chemeeta cherovaicho reta pe. Jae co penti ucaru oï che ndive vae —jei.

19 Jayave jae reta ipiatiti, jare upirandu Jesús pe penti penti rupi:

—¿Che pa co jae?

20 —Pe reta co jae doce cheremimboe reta —jei Jesús chupe reta—. Penti pepite pe oï vae co jae. Mbiyape umäqui oï che ndive plato pe vae co jae —jei—. **21** Che cuimbaerã ayeyapo vae aañotai amano vaerã, Tumpa iñee pe uyecuatía oï cheregua rami. Êrei jocua cuimbae chemeeta vae uiporarata co. Icavi tẽi mona jocua cuimbae mbaeti ico yave —jei.

22 Jare jae reta ucaru ñugüïinoi rambueve, Jesús uipisi mbiyape, jare umee yasurupai Tumpa pe. Jayave upisää mbiyape jare umee chupe reta.

—Peu —jei chupe reta—. Cua co jae cherete —jei.

23 Jayave Jesús uipisi vi penti copa, jare yasurupai umee ye yave Tumpa pe, umee jemimboe reta pe. Jare opareve jou copa güi. **24** Jesús jei chupe reta:

—Cua co jae cherugüi. Cherugüi uyepiyereta, Tumpa jei piau ye vae uyeyapo vaerã, jarejeta vae reta uyembiasaca vaerã —jei Jesús—.

25 Añete che jae peve, ndarau ma jau uva ticuecue, Tumpa iporoyocuia pe uva ticuecue ipiau vae jau regua —jei chupe reta.

Pedro uicuacuta Jesús
(Mt 26.30-35; Lc 22.31-34; Jn 13.36-38)

26 Jare opa yave ucanta reta Tumpa pe, oẽ reta yugüiraa ivitu guasu Olivos coti. **27** Jayave Jesús jei chupe reta:

—Opaete pe reta chereyata cua pítu. Echa'ã Tumpa iñee pe uyecuatía oĩ cuarãi: ‘Ayucata ovecha reta iyandarecoa, jare ovecha reta opata uñemíai.’ Jucuarãi uyecuatía oĩ —jei chupe reta—. **28** Ërei aicove ye ayu yave umanocue vae reta ipite güi, aata perenonde Galilea pe —jei.

29 Jayave Pedro jei Jesús pe:

—Yele tẽi opaete ūru reta tandereya, ërei che ndarau ndueya.

30 —Añete che jae ndeve —jei Jesús chupe—, cua pítu etei, ndei mocuive se uru cuimbae uñee mbove, mbapí vese ma checuacuta —jei.

31 Ërei Pedro jeiteje jei:

—Yele tẽi tamano nde ndive, ërei ndaraui nducuacu.

Jare jucuarãi vi jei opaete Jesús jemimboe reta.

Jesús uyerure Getsemaní pe
(Mt 26.36-46; Lc 22.39-46)

32 Jayave yugüiraa uvâe reta Getsemaní pe.

—Peguapi cua pe, che aa ayerure Tumpa pe rambueve —jei Jesús jemimboe reta pe.

33 Jayave güiraa Pedro, Jacobo jare Juan, jare umbipi ipiatiti jare uiporara.

34 —Tuicha chepiatiti, jare amano pota echa. Pepita cua pe, jare agüiye peque —jei jocua mbapí jemimboe reta pe.

35 Jayave Jesús usiri catu chugüii reta, jare uyeatica ivi re. Uyerure Tumpa pe, Tumpa uipota yave, umbiasa vaerã chugüii jocua uyeyapota chupe vae.

36 —CheRu, cheRu, opaete mbae ndepuere ndiyapo. Embiasa chegüi cua aiporarata vae. Ërei tuyeyapo cheve nde ndere vae. Agüiye tuyeyapo che jae vae —jei.

37 Jayave Jesús ou jemimboe reta ñugüinói vae pe, jare uecha oque ñugüinói. Jayave jei Simón Pedro pe:

—Simón, ¿ndeque pa? ¿Ndepuere'ã pa ndeque mbae neñ penti ora yepe? —jei chupe.

38 Jei vi jemimboe reta pe:

—Agüiye peque. Piyerure Tumpa pe, agüiye vaerã peyoa. Pepia pe peratangatú co, ërei perete iyaquí co —jei.

39 Jayave Jesús usiri ye uyerure Tumpa pe tenonde uyerure vae rami.

40 Jayave ou ye jemimboe reta ñugüinói vae pe, jare uecha oque ye ñugüinói. Echa'ã jae reta jopei ete ma. Jare uicua'a mbae jei vaerã Jesús pe. **41** Jayave Jesús usiri ye mbapía re, jare ou ye yave, jei chupe reta:

—Peque jare peputuuño ma. Jocuaño ma. Ora uvāe ma. Che cuimbaerā ayeyapo vae penti vae chemeeta cuimbae jeco pochi vae reta pe —jei—.
42 Pepúa. Yaaño ma. Mase, chemeeta vae coiño ma ou —jei chupe reta.

Uipisi reta Jesus
(Mt 26.47-56; Lc 22.47-53; Jn 18.2-11)

43 Jare uyemingueta oī rambueve, ou Judas - jae co jocua doce vae güi penti. Jeta vae yugüieru jae ndive iquiserucu reve jare iivira reve reve. Sacerdote reta itenondegua reta, mboroyocui re oporomboe vae reta, jare tenta guasu pegua reta itenondegua reta ombou Jesús pe cua reta. **44** Jare umeeta vae umimbue ma īru reta pe mbae uyapota vae. Jei ma chupe reta:

—Jocua ayurupiteta vae co jae. Pipisi curi, jare peraa. Agüiye tosi —jei.

45 Judas ou uvāe yave, ou voi Jesús oī vae pe.

—Oporomboe vae, oporomboe vae —jei chupe.

Jayave uyurupite. **46** Jayave uipisi reta Jesús. **47** Jare penti cuimbae joco pe oī vae uequi iquiserucu jiru güi, sacerdote tenondegua jembiocui re uiporu, jare uyasia inambi chugüi. **48** Jayave Jesús jei yugüieru vae reta pe:

—¿Maera pa Peru quisepucu reta jare iivira reta chepisi vaerā, imonda vae pipisi vae ramí? **49** Opa ara aico pe reta ndive Tumpa jo pe. Joco pe aporomboe, jare chepisiā. Êrei piyapo cua, Tumpa iñee uyecuatía oī vae uyeyapo vaerā —jei.

50 Jayave opaete jemimboe reta ueya Jesús, jare opa osi.

Cunumi osi vae

51 Jare penti cunumi uñepēguia penti asoya pe vae oo Jesús jaicue rupi. Jare amocue joco pe ñugüinói vae reta uipisi tēi. **52** Êrei jae ueya iyasoya, jare nani etei oē osi.

Jesús uyemboi jovaicho reta jovai
(Mt 26.57-68; Lc 22.54-55, 63-71; Jn 18.12-14, 19-24)

53 Jayave güiraa reta Jesús sacerdote tenondegua jenta pe. Jare joco pe uyembati opaete sacerdote reta itenondegua reta, tenta guasu pegua reta itenondegua reta, jare mboroyocui re oporomboe vae reta. **54** Jare Pedro oo vi Jesús jaicue. Êrei mbiriño oo chugüi. Jae uique sacerdote tenondegua joca pe, jare uguapi sacerdote tenondegua jembiocui reta ndive uyepee ñugüinói tataipi pe. **55** Jare sacerdote reta itenondegua reta jare opaete īru mburuvicha reta ueca quía uñeapo vaerā Jesús re, uyuacaca vaerā. Êrei uvāelā reta teco jese. **56** Yepe tēi jeta vae iyapu reve uñeapo jese, ërei jei reta tēi vae oyovaqueā. **57** Jare amocue upúa uñeapo iyapu reve jese vae jei:

58 —Ore nduyandu jei: ‘Ambusururuta Tumpa jo cuimbae reta uyapo vae, jare mbapi ara pe che ayapota īru Tumpa jo cuimbae reta uyapotalā vae’ —jei, jei reta.

59 Êrei yepe tēi jucuarāi jei reta, ërei jei reta tēi vae oyovaqueā. **60** Jayave sacerdote tenondegua upúa uyemboi yati vae reta ipite pe, jare upirandu Jesús pe:

—¿Maera pa niñee nemoë'ā? ¿Mbae re pa cua reta uñeapo nderé? —jei.

⁶¹Êrei Jesús quïño. Jei'ā mbae ave. Jayave sacerdote tenondegua upirandu ye chupe:

—¿Nde pa co jae Cristo, Tumpa ombou vae? ¿Nde pa co jae Tumpa Tai? —jei.

⁶²—Jae co che —jei Jesús chupe—. Jare che cuimbaerä ayeyapo vae cherechata co aguapí aï Tumpa mbaepuere güïnoi vae iyipí pe iyacata coti. Cherechata vi ayu amapítu reve —jei.

⁶³Jayave sacerdote tenondegua cua uyandu yave, pochi ramo omondoro jemimondei, jare jei:

—¿Maera ma pa yaeca yeta ñiru vae reta uñeapo vaerä jese? ⁶⁴Piyandu ma icavi mbae vae jei Tumpa coti —jei—. ¿Mbae pa pere añave? —jei.

Jayave opaete reve jei reta:

—Icaví'ā co. Icavi co yayucaca vaerä —jei reta.

⁶⁵Jare amocue vae umbipí undíví jese, jare uesañoma, jare ocua jese. Jare jei Jesús pe:

—Emífbeu oreve quía ra ocua oï nderé.

Jare sacerdote tenondegua jembiocui reta ocua vi jese.

Pedro uicuacu Jesús

(Mt 26.69-75; Lc 22.56-62; Jn 18.15-18, 25-29)

⁶⁶Jare Pedro oca pe oï rambueve, ou penti cuñatai sacerdote tenondegua pe uyeyocui vae. ⁶⁷Jare uecha yave Pedro uyepee oï, omundo umae jese.

—Nde vi co jae Jesús Nazaret pegua iïru —jei chupe.

⁶⁸Jayave Pedro uicuacu Jesús.

—Aicuaa'ā jocua cuimbae, jare aicuaa'ā mbae ndere vae —jei Pedro chupe.

Jayave Pedro oo onque tuicha vae coti. Jare uru cuimbae uñee.

⁶⁹Jayave cuñatai uecha ye, jare imiari jese joco pe ñugüïnoi vae reta pe:

—Cua cuimbae co jae penti Jesús iïru —jei.

⁷⁰Êrei Pedro uicuacu ye. Jare ndei ima mbove joco pe ñugüïnoi vae reta jei ye Pedro pe:

—Añete nde co jae penti Jesús iïru. Echa'ā nde vi co jae penti Galilea pegua. Nde ndiyemingueta jae reta uyemingueta vae rami —jei reta chupe.

⁷¹Jayave Pedro jei Tumpa jee re:

—Tumpa tuiporaraca cheve cua jae vae añetete'ā yave. Aicuaa'ā jocua cuimbae piyemingueta pejí jese vae.

⁷²Jayave uru cuimbae uñee ma mocui vese. Jare Pedro imandúa Jesús jei chupe vae re: “Ndei mocui vese uru cuimbae uñee mbove, mbapi vese ma checuacuta.” Jare cua re ipia pe uyemingueta yave, umbipí uyao.

Jesús uyemboi Pilato jovai
(Mt 27.1-2, 11-14; Lc 23.1-5; Jn 18.28-38)

15 ¹Jayave cõe rupive sacerdote reta itenondegua reta, tenta guasu pegua reta itenondegua reta, mboroyocui re oporomboe vae reta, jare opaete ūru mburuvicha reta uyembati uyeminguela ñugüinoi reta uyupii. Jayave uipocua Jesús jare güiraa Pilato pe umee. ²Jayave Pilato upirandu Jesús pe:

—¿Nde pa co jae judío reta juvicha guasu?

—Nde ndere rami jae co che —jei Jesús chupe.

³Jayave sacerdote reta itenondegua reta uñeapo Jesús re jeta mbaembae re. ⁴Jayave Pilato upirandu ye Jesús pe:

—¿Maera pa niñee nemoel'ā? Mase, jeta mbaembae re uñeapo reta nderé —jei.

⁵Ērei Jesús jei'ā mbae ave chupe. Jáeramo Pilato ipiacañi jese.

Pilato jei Jesús umanota co
(Mt 27.15-31; Lc 23.13-25; Jn 18.38-19.16)

⁶Jare pascua ara rupi Pilato oyoracañoi penti pereso tenta guasu pegua reta uipota vae. ⁷Jare peresoríru pe ñugüinoi amocue upuruyuca vae reta. Cua reta upuruyuca, mburuvicha reta ndive uñerāro yave. Penti jee co Barrabás. ⁸Jare jeta vae yugüieru uyerure Pilato pe uyapo vaerā chupe reta opa año uyapo rami. ⁹Jayave Pilato jei chupe reta:

—¿Pipota pa ayoraca vaerā peve judío reta juvicha guasu?

¹⁰Echa'ā jae uicuua sacerdote reta itenondegua reta umee Jesús chupe ñacatāa jese ramo. ¹¹Ērei sacerdote reta itenondegua reta omboemboe yati vae reta:

—Piyerure Pilato pe oyoraca vaerā peve Barrabás. Agüiye toyoraca Jesús —jei reta.

Jayave jucuarāi uyerure reta Pilato pe. ¹²Jayave Pilato upirandu chupe reta:

—Barrabás ayoraca yave, ¿mbae pa pipota ayapo vaerā cua cuimbae judío reta juvicha guasu pere chupe vae pe?

¹³Jayave jae reta iñeeāta reve jei:

—Icutuca curusu re.

¹⁴Ērei Pilato upirandu chupe reta:

—¿Mbae icavi mbae vae pa uyapo?

Ērei jae reta jeite iñeeāta reve jei:

—Icutuca curusu re.

¹⁵Jayave Pilato oyoraca chupe reta Barrabás, uipota umbiyerovia reta ramo. Jare Pilato uinupaca yave Jesús chicote pe, umee sundaro reta pe, uicutu vaerā curusu re.

¹⁶Jayave sundaro reta güiraa Jesús juvicha joca palacio pe, jare ueni opaete ūru sundaro reta. ¹⁷Jayave sundaro reta omondeca Jesús pe temimonde pīta vae, jare oñope yurāti catuui vae, jare umbapúa oñono Jesús iñaca re. ¹⁸Jayave umbipi umbiadora-raanga reta.

—¡Viva, judío reta juvicha guasu! —jei reta.

¹⁹Jare uiporu reta iñaca re ivira. Jare undivi reta jese, jare uyeatica reta jae jovai umbiadura-raanga vaerā. ²⁰Jare opa oyoyai reta yave, sundaro reta omboi chugüi temimonde pita vae, jare omondeca ye chupe jae jemimondei. Jayave güiraa reta mburuvicha guasu joca güi, uicutu vaerā curusu re.

Jesús uyecutuca curusu re

(Mt 27.32-44; Lc 23.26-43; Jn 19.17-27)

²¹Penti cuimbae Simón jee vae tenta guasu Cirene pegua, Alejandro jare Rufo tu, ou uvae tenta guasu coti. Jocoropi uasa oo oí yave, sundaro reta güiraa chupe Jesús icurusu. ²²Jare sundaro reta güiraa Jesús Gólgota jee vae pe. (Cua uipota jei: “Acacuerenda.”) ²³Jayave umee reta Jesús pe vino uyea mirra ndive vae. Erei Jesús jou’ā. ²⁴Jayave sundaro reta uicutu curusu re. Jayave uyuguari reta Jesús jemimonde re, uicuua vaerā mbae nunga penti penti güiraa iyupe vaerā. ²⁵Jare neimbove yave nueve pe, uicutu reta Jesús curusu re. ²⁶Jare oñono reta curusu re Jesús iñaca iárambo uyecuatía mbae umbijeco jesegua vae: “Judío reta juvicha guasu.” ²⁷Jare sundaro reta uicutu vi curusu re mocui imonda vae reta, jare oñono penti Jesús iyacata coti jare íru iyaso coti. ²⁸Jare uyeyapo ma Tumpa iñee uyecuatía oí vae: “Íru vae reta jei tēi jae vi co penti icavi mbae vae.” ²⁹Jare uasa vae reta uñeācambivava reve jei icavi mbae vae Jesús pe.

—Aa! —jei reta—. Nde ndere nembusururuta co Tumpa jo jare ndiyapo yeta mbapi ara pe. ³⁰Iyerepi añave, jare egüeyi curusu güi —jei reta.

³¹Jae ramiño vi sacerdote reta itenondegua reta jare mboroyocui re oporomboe vae reta imiari uyupe yave, oyoyai reta.

—Jae uepi íru vae reta —jei reta—. Erei ipuere’ā jae uyerepi. ³²Jae co Cristo, Tumpa ombou vae yave, jae co Israel pegua reta juvicha guasu yave, tugüeyi añave curusu güi, yaecha vaerā, jare yarovia vaerā —jei reta.

Jare Jesús ndive uyecutu ñugüinói vae reta vi jei icavi mbae vae chupe.

Jesús humano

(Mt 27.45-56; Lc 23.44-49; Jn 19.28-30)

³³Jare guarasi ara mbite güive mbapi ora rupi uñemipitumimbi opaete ivi pe. ³⁴Jayave mbapi ora ma caaru yave, Jesús iñeeata reve jei:

—Eloí, Eloí, ¿lama sabactani? (Cua uipota jei: “CheTumpa, cheTumpa, ¿maera pa chereya?”)

³⁵Amocue joco pe ñugüinói vae uyandu jare jei tēi:

—Mase, Elías ueni.

³⁶Jare penti vae osi oo umäqui esponja vinagre pe, jare oñono ivira re, jare omondo Jesús iyuru coti.

—Peáro —jei—. Yaecha ou Elías umbigüeyi vaerā —jei.

³⁷ Jayave Jesús tanta usapicai, jare umano. ³⁸ Jayave Tumpa jo umbiyao vae osoro mbite rupi ivate güi ivi coti. ³⁹ Jare sundaro reta juvicha Jesús jovai uyemboi oí vae uecha yave quirai usapicai jare umano, jei:

—Añeteñoi yepe, cua cuimbae co jae Tumpa Tai.

⁴⁰ Jare amocue cuña reta umae ñugüinoi mbiri güi. Cua reta ipite pe ñugüinoi María Magdalena, Salomé jare María. Cua María imembi reta co jae Jacobo tairusu vae jare José. ⁴¹ Jesús Galilea pe icose yave, cua cuña reta yugüiraa jae ndive uyeyocui vaerā chupe. Jare jeta ūru cuña yugüeru jae ndive Jerusalén pe vae reta joco pe ñugüinoi vi.

José oñono Jesús jetecue teögüeriru pe
(Mt 27.57-61; Lc 23.50-56; Jn 19.38-42)

⁴² Jocua ara opaete judío reta uyeyapicatu ñugüinoi piareve peguarā. Echa'lā piareve pe co mbutuu ara. Jáeramo guarasi uique ma yave, ⁴³ penti cuimbae tenta guasu Arimatea pegua José jee vae uñemiatangātu oo Pilato pe, jare uyerure chupe Jesús jetecue re. José co jae penti mburuvicha. Opaete tenta guasu pegua reta uiipiú cua José. Jae uáro ico Tumpa iporoyocuia. ⁴⁴ Jare Pilato ipiacañi Jesús umano ma vae re. Jayave ueni sundaro reta juvicha, jare upirandu chupe quirai yave ra umano Jesús. ⁴⁵ Jare sundaro reta juvicha umimbeu chupe. Jayave Pilato jei José pe:
—Ndepuere nderaa Jesús jetecue.

⁴⁶ Jayave José ogua nieso. Jare umbigüeyi ma yave Jesús jetecue, oñoma nieso pe. Jayave oñono penti teögüeriru itape uyeyoo vae pe, jare umbiyapayere ita tuicha vae teögüeriru jonque re. ⁴⁷ Jare María Magdalena jare José ichi María jee vae uecha quiape oñono Jesús jetecue.

Jesús icove ye
(Mt 28.1-10; Lc 24.1-12; Jn 20.1-10)

16 ¹Mbutuu ara uasa ma yave, María Magdalena, Jacobo ichi María jee vae jare Salomé ogua mbae ipiche cavi vae, jare yugüiraa uipichi vaerā Jesús jetecue re. ²Jare neimbove asi domingo ara pe cua cuña reta yugüiraa teögüeriru coti. ³Jare jei reta uyupe:

—¿Quía ra umbisirita yandeve ita tuicha vae teögüeriru jonque güi?

⁴Érei umae reta yave, uecha ita uyembisiri ma teögüeriru jonque güi. Jocua ita tuicha co. ⁵Jare uique reta yave teögüeriru pe, uecha penti cunumi uguapi oí iyacata coti. Jemimonde pucu jare tī. Jare ipiacañi reta jese. ⁶Érei cunumi jei chupe reta:

—Agüiye pepiacañi. Peeca co peī Jesús Nazaret pegua uyecutuca curusu re vae. Jae icove ye ma ou umanocue vae reta ipite güi. Mbaeti ma cua pe oí. Mase, pemae jendacue re —jei—. ⁷Pecua pere jemimboe reta pe jare Pedro pe: ‘Jae oota perenonde Galilea pe. Joco pe peechnata, jae jei peve vae ramí’ —pere chupe reta, jei.

⁸Jayave cuña reta oẽ teōgüreriu güi, jare tanta osi yugüiraa. Uquiyे ramo umbipi uriri. Jare jei'ã mbae ave quía pe.

María Magdalena uecha Jesús
(Jn 20.11-18)

⁹Jesús icove ye ou umanocue vae reta ipite güi neimbove asi domingo ara pe. Jayave uyeechaca tenonde ete María Magdalena pe. Tenonde yave Jesús umbisiri siete año reta cua cuña güi. ¹⁰María oo umimbeu Jesús ndive yugüirecose vae reta pe. Jae reta ipiatiti ramo uyao ñugüinoi. ¹¹María jei chupe reta:

—Jesús icove ye ma oĩ. Aecha ma —jei chupe reta.
Êrei uyandu yave, güirovia'ã reta.

Mocui jemimboe reta uecha Jesús
(Lc 24.13-35)

¹²Cua jaicue rupi Jesús uyeechaca mocui jemimboe reta pe, jae reta yugüiraa rambueve tape rupi tenta mbae vae coti. Ambie vae echa Jesús chupe reta. ¹³Jae reta yugüeru ye tenta guasu pe umimbeu ūru reta pe. Êrei jeseve güirovia'ã reta.

Jesús oyocui jocua once jemimboe reta
(Mt 28.16-20; Lc 24.36-49; Jn 20.19-23)

¹⁴Cua jaicue rupi Jesús uyeechaca jocua once jemimboe reta pe etei, jae reta ucaru ñugüinoi rambueve, jare uñeengata chupe reta, upurugüirovia'ã jare ipiatanta ramo. Echa'ã ūru vae reta uecha Jesús, icove ye yave ou umanocue vae reta ipite güi, jare umimbeu tēi jemimboe reta pe. Êrei jae reta güirovia'ã. ¹⁵Jayave Jesús jei chupe reta:

—Pecua opaete ivi rupi. Pemimbeu Tumpa iñee icavi vae opaete ivi pegua reta pe —jei—. ¹⁶Jocua güiroviata jare uyembibautizacata vae uyembiasacata. Êrei jocua güirovia'ã vae ucañiteita co —jei—. ¹⁷Jare ūru vae reta uechata güirovia vae reta uyapo ñugüinoi cua nunga miacañi reta. Cheree re jae reta umbisirita año reta oya jese vae reta güi. Uyeminguetata ambie ñee pe. ¹⁸Uipisita mboi reta. Jou yave imbayachi vae, ndarau mbae uyeyapo chupe reta. Oñonota ipo imbaerasi vae reta re umbigüera vaerä —jei chupe reta.

Jesús oo ara pe
(Lc 24.50-53)

¹⁹Jayave yandeYa opa uyeminguela yave jae reta ndive, oo ara pe, jare uguapi Tumpa iyipi pe iyacata coti. ²⁰Jare jemimboe reta yugüiraa umimbeu Tumpa iñee opaete que rupi. Jare yandeYa ombori, jare uicuaaca ūru vae reta pe jemimboe reta jei vae añete vae miacañi reta uyapo vae rupi. Jaeño ma.